

學

統

學統卷之四十一

孝昌熊賜履敬修甫編

附統

金履祥

金履祥字吉父。婺之蘭溪人。其先本劉氏。後避吳越錢武肅王嫌名。更爲金氏。履祥從曾祖景文。當宋建炎紹興間。以孝行著稱。履祥幼而敏睿。父兄稍授之書。卽能記誦。比長。益自策勵。凡天文。地理。禮樂。田乘。兵謀。陰陽。律曆之書。靡不畢究。及壯。知向濂洛之學。

事同郡王柏從登何基之門。基則學於黃幹而幹親承考亭之傳者也。自是講貫益密。造詣益邃。時宋事已不可爲。履祥遂絕意進取。然雅負經濟之畧。未忍遽忘情斯世也。會襄樊之師日急。宋人坐視而不敢救。履祥因進牽制擣虛之策。請以重兵出海道。直趨燕薊。則襄樊之師將不攻而自解。且備敘海船所經。九州郡縣邑。下至巨洋別島。難易遠近。厯厯可據。以行。宋終莫能用。及後朱瑄張清獻海運之利。所由海道。視履祥先所上書。咫尺無異者。然後人服其精確。

德祐初以廸功郎史館編校起之辭弗就宋將改物
所在盜起履祥屏居金華山中兵燹稍息則上下巖
谷追逐雲月寄情嘯咏視世故泊如也平居獨處終
日儼然至與物接則盎然和懌訓廸後學諄切無倦
而尤篤於分義有故人子坐事母子分配爲隸不相
知者十年履祥傾貲營構卒贖以完其子後貴履祥
終不言自相見勞問辛苦而已何基王柏之喪履祥
率其同門之士以義制服觀者始識師弟子之繫於
常倫也履祥嘗謂司馬文正公光作資治通鑑秘書

丞劉恕爲外紀以記前事。不本於經而信百家之說。是非謬於聖人。不足以傳信。自帝堯以前。不經夫子所定。固野而難質。夫子因魯史以作春秋。王朝列國之事。非玉帛之使。則魯史不得而書。非聖人筆削之所加也。況左氏所記。或闕或誣。凡此類皆不得以辟經爲辭。乃用邵氏皇極經世。歷胡氏皇王大紀之例。損益折衷。一以尚書爲主。下及詩禮春秋。旁採舊史諸子。表年繫事。斷自唐堯以下。接於通鑑之前。勒成一書。二十卷。名曰通鑑前編。凡所引書。輒加訓釋。以

裁正其義多。儒先所未發。既成以授門人許謙曰。三
帝三王之盛。其微言懿行。宜後王所當法。戰國申商
之術。其苛法亂政。亦後王所當戒。則是編不可以不
著也。他所著書曰大學章句疏義二卷。論語孟子集
註考證十七卷。書表注四卷。謙爲益加校定。皆傳於
學者。天曆初。廉訪使鄭允中表上其書於朝。初履祥
既見王柏。首問爲學之方。柏告以必先立志。且舉先
儒之言。居敬以持其志。立志以定其本。志立乎事物
之表。敬行乎事物之內。此爲學之大方也。及見何基。

基謂之曰。會之屢言賢者之賢。理欲之分。便當自今始。會之蓋柏字也。當時議者以爲基之清介純實。似尹和靖。柏之高明剛正。似謝上蔡。履祥則親得之二子。而並克於已者也。履祥居仁山之下。學者因稱爲仁山先生。大德中卒。元統初。里人吳師道爲國子博士。移書學官。祠履祥於鄉學。至正中。賜諡文安。

許謙

許謙字益之。其先京兆人。九世祖延壽。宋刑部尚書。八世祖仲容。太子洗馬。仲容之子曰洸。曰洞。洞由進。

士起家以文章政事知名於時。洸之子實事海陵胡
瑗。能以師法終始者也。由平江徙婺之金華。至謙五
世爲金華人。父觥登淳祐七年進士第。仕未顯以歿。
謙生數歲而孤。甫能言。世母陶氏口授孝經論語。入
耳輒不忘。稍長。肆力於學。立程以自課。取四部書分
晝夜讀之。雖疾恙不廢。旣乃受業金履祥之門。履祥
語之曰。士之爲學。若五味之在和。醢醬旣加。則酸醎
頓異。子來見我已三日。而猶夫人也。豈吾之學無以
感發子耶。謙聞之惕然。居數年。盡得其所傳之奧。於

書無不讀。窮採聖微。雖殘文美語。皆不敢忽。有不可
通。則不敢強於先儒之說。有所未安。亦不苟同也。讀
四書章句集註。有叢說二十卷。謂學者曰。學以聖人
爲準的。然必得聖人之心。而後可學聖人之事。聖賢
之心。具在四書。而四書之義。備於朱子。顧其辭約意
廣。讀者安可以易心求之。讀詩集傳。有名物鈔八卷。
正其音釋。考其名物。度數以補先儒之未備。仍存其
逸義。旁採遠援。而以己意終之。讀書集傳。有叢說六
卷。有與蔡氏不能盡合者。每誦金履祥之言曰。惟其

是而已。其觀史有治忽幾微若干卷。倣史家年經國
緯之法。起大皞氏迄宋元祐元年秋九月。尚書左僕
射司馬光卒。備其世數。總其年歲。原其興亡。著其善
惡。蓋以爲光卒。則中國之治不可復興。誠理亂之機
也。故附於讀經而書。孔子卒之義。以致其意焉。又有
自省編畫之所爲。夜必書之。其不可書者。則不爲也。
其他若天文地理典章制度食貨刑法字學音韻醫
經術數之說。靡不該貫。旁通而釋老之言。亦洞究其
蘊。嘗謂學者。孰不曰闢異端。苟不深探其隱而識其

所以然能辨其同異別其是非也。幾希。又嘗句讀九經儀禮及春秋三傳於其宏綱要領錯簡愆文悉別以鉛黃朱墨。意有所明則表而見之。其後吳師道購得呂祖謙點校儀禮視謙所定不同者十有三條而已。謙不喜矜露。所爲詩文非扶翼經義。張維世教則未嘗輕筆之書也。延祐初謙居東陽入華山學者翕然從之。尋開門講學遠而幽冀齊魯近而荆楊吳越皆不憚百舍來從受業焉。其教人也至誠諄悉。內外殫盡。嘗曰。已有知使人亦知之。豈不快哉。或有所問。

難而辭不能自達。則爲之言。其所欲言。而解其所惑。討論講貫。終日不倦。攝其粗疎。入於密微。聞者方傾耳聽受。而其出愈真切。情者作之。銳者抑之。拘者開之。放者約之。及門之士。著錄者千餘人。隨其材分。咸有所得。然獨不以科舉之文授人。曰。此義利之所由分也。謙篤於孝友。有絕人之行。其處世不膠於古。不流於俗。不出里閭者四十年。四方之士。以不及門爲耻。縉紳先生之過其鄉邦者。必卽其家存問焉。或訪以典禮政事。謙觀其會通。而爲之折衷。聞者無不悅。

服大德中歲大侵謙貌加瘠或問曰豈食不足耶謙曰今公私匱竭道殣相望吾能獨飽耶其處心蓋如此廉訪使劉廷直副使趙宏偉皆中州雅望於謙深加推服論薦於朝中外名臣列其行義者前後章數十上而郡復以遺逸應詔鄉闈大比請司其文衡皆莫能致至其晚節獨以正身任學之重遠近學者以其身之安否爲斯道之隆替焉至元三年卒年六十八諡曰文懿謙嘗以白雲山人自號世因稱爲白雲先生先是何基王柏及金履祥歿其學猶未大顯至

謙而其道益著。故學者推原統緒，以爲晦庵之世適江浙行中書省，爲請於朝，建四賢書院，以奉祠事，而列於學官。同郡朱震亨，字彥修，謙之高弟子也。其清修苦節，絕類古篤行之士，所至人多化之。

陳櫟

陳櫟，字壽翁，休寧人。生三歲，祖母吳氏口授孝經論語，輒成誦。五歲入小學，卽涉獵經史。七歲通進士業。年十五，鄉人皆師之。宋亡，科舉廢，櫟慨然發憤，致力於聖人之學，涵濡玩索，貫穿古今，嘗以謂有功於聖

門者莫若朱熹氏熹歿未久而諸家之說往往亂其
本真乃著四書發明書傳纂疏禮記集義等書亡慮
數十萬言凡諸儒之說有畔於朱氏者刊而去之其
微辭隱義則引而伸之而其所未備者復爲說以補
其闕於是朱氏之說大明於世延祐初詔以科舉取
士櫟不欲就試教授於家不出門戶者數十年性孝
友尤剛正日用之間動中禮法與人交不以勢合不
以利遷善誘學者諄諄不倦臨川吳澄嘗稱櫟有功
於朱氏爲多凡江東人來受業於澄者盡遣而歸櫟

櫟所居堂曰定宇。學者因以定宇先生稱之。元統二年卒。年八十三。揭傒斯誌其墓。乃與吳澄並稱曰澄居通都大邑。又數登用於朝。天下學者四面而歸之。故其道遠而章尊。而明櫟居萬山間。與木石俱而足跡。未嘗出鄉里。故其心學待其書之行天下。乃能知之。及其行也。亦莫之禦。是可謂豪傑之士矣。世以爲知言。

胡一桂

胡一桂字庭芳。婺源人。生而穎悟。好讀書。尤精於易。

初德興沈貴寶受易於董夢程。夢程受朱晦庵之易於黃幹。而一桂之父方平及從貴寶夢程學。嘗著易學啓蒙通釋。一桂之學出於方平。得朱氏源委之正。宋景定甲子。一桂年十八。遂領鄉薦。試禮部。不第。退而講學。遠近師之。號雙湖先生。所著書有周易本義附錄纂疏。本義啓蒙易傳。朱子詩傳附錄纂疏。十七史纂竝行世。

趙復

趙復字仁甫。德安人也。元太宗乙未歲。命太子濶出。

帥師伐德安以嘗逆戰其民數十萬皆俘戮無遺時
楊惟中行中書省軍前姚樞奉詔即軍中求儒道釋
醫卜士凡儒生掛俘籍者輒脫之以歸復在其中樞
與之言信奇士以九族俱殘不欲北因與樞訣樞恐
其自裁留帳中共宿既覺月色皓然惟寢衣在遽馳
馬周號積屍間無有也行及水際則見復已披髮走
號仰天而號欲投水而未入樞曉以徒死無益汝存
則子孫或可以傳緒百世隨吾而北必可無他復強
從之先是南北道絕載籍不相通至是復以所記程

朱○所○著○諸○經○傳○註○盡○錄○以○付○樞○自○復○至○燕○學○于○從○者○
百○餘○人○世○祖○在○潛○邸○嘗○召○見○問○曰○我○欲○取○朱○卿○可○導○
之○乎○對○曰○宋○吾○父○母○國○也○未○有○引○他○人○以○伐○吾○父○母○
者○世○祖○悅○因○不○強○之○仕○聞○復○論○議○始○嗜○其○學○乃○與○樞○
謀○建○太○極○書○院○立○周○子○祠○以○二○程○張○楊○游○朱○六○君○子○
配○食○選○取○遺○書○八○千○餘○卷○請○復○講○授○其○中○復○以○周○程○
而○後○其○書○廣○博○學○者○未○能○貫○通○乃○原○義○農○堯○舜○所○以○
繼○天○立○極○孔○子○顏○孟○所○以○垂○世○立○教○周○程○張○朱○氏○所○
以○發○明○紹○續○者○作○傳○道○圖○而○以○書○條○例○於○後○別○著○伊○

洛發揮以標其宗旨。朱子門人散在四方。則以見諸
登載。與得諸傳聞者。共五十有三人。作師友圖。以寓
私淑之志。又取伊尹顏淵言行作希賢錄。使學者知
所嚮慕。然後求端用力之方備矣。樞旣退隱蘇門。乃
卽復傳其學。由是許衡郝經劉因皆得其書而尊信
之。北方知有程朱之學。自復始。復爲人樂易而耿介
雖燕居不忘故土。與人交尤篤分誼。元好問文名擅
一時。其南歸也。復贈之言以博溺心末喪本爲戒。以
自修讀易求文王孔子之用心爲勉。其愛人以德類

若此復家江漢之上以江漢自號學者稱之曰江漢先生。

張頌

張頌字達善其先蜀之導江人蜀亡僑寓江左金華王柏得考亭三傳之學嘗講道於台之上蔡書院頌從而受業焉自六經語孟傳註以及周程張氏之微言朱子所嘗論定者靡不潛心玩索究極根柢用功既專久而不懈所學益宏深微密南北之士鮮能及之至元中行臺中丞吳曼慶聞其名延至江寧學宮

俾于弟受業中州。士大夫欲淑子弟以朱子四書者，皆遣從頤游。或聞私塾，迎之。其在維揚，來學者尤衆。遠近翕然尊爲碩師，不敢字呼。稱曰導江先生。大臣薦諸朝，特命爲孔顏孟三氏教授。鄒魯之人服誦遺訓久而不忘。頤氣宇端重，音吐洪亮，講說特精詳。子弟從之者，誦誥如也。其高第弟子知名者甚多。頤卒，無子。有經說及文集行世。吳澄序其書以爲議論正，援據博，貫穿縱橫，儼然新安朱氏之尸祝也。至正中，真州守臣以頤及郝經、吳澄皆嘗留儀真，作祠宇祀。

之曰三賢祠

黃澤

黃澤字楚望其先長安人唐末有名舒藝者知資州
內江縣卒葬焉子孫遂爲資州人父儀可累舉不第
隨兄驥子官九江蜀亂不能歸因家焉澤生有異質
慨然以明經學道爲志好爲苦思屢以成疾疾止復
思久之如有所見作顏淵仰高鑽堅論蜀人治經必
先古注疏澤於名物度數考覈精審而義理一宗程
朱作易春秋二經解二禮祭祀述畧大德中江西行

省相臣聞其名、授江州景星書院山長、使食其祿、以
施教授。又爲山長於洪之東湖書院、受學者益衆。始
澤嘗夢見夫子、以爲適然、旣而屢夢見之、最後乃夢
夫子手授所校六經字畫如新、由是深有感發。始悟
所解經多徇舊說爲非、是乃作思古吟十章、極言聖
人德容之盛。上達於文王周公、秩滿卽歸、閉門授徒。
以養親、不復言仕。嘗以爲去聖久遠、經籍殘缺、傳注
家率多傳會、近世儒者又各以才識求之、故議論雖
多、而經旨愈晦、必積誠研精、有所悟入、然後可以窺

見聖人之本真。乃揭六經中疑義千有餘條。以示學者。既乃盡悟失傳之旨。自言每於幽閒寂寞顛沛流離疾病無聊之際。得之久。則豁然無不貫通。自天地定位。人物未生已前。沿而下之。凡邃古之初。萬化之原。載籍所不能具者。皆昭若發蒙。如示諸掌。然後由伏羲神農五帝三王。以及春秋之末。皆若身在其間。而目擊其事。於是易春秋傳注之失。詩書未決之疑。周禮非聖人書之謗。凡數十年苦思而未通者。皆渙然冰釋。各就條理。故於易以明象爲先。以因孔子之

言上求文王周公之意爲主。而其機則盡在十翼。作
十翼舉要忘象辨象畧辨同論於春秋以明書法爲
主。其大要則在考覈三傳以求向上之功。而舛絡盡
在左傳。作三傳義例考。筆削本旨。又作元年春王正
月辨。諸侯娶女立子通考。魯隱公不書卽位義。殷周
諸侯禘祫考。周廟太廟單祭合食說。作邱甲辨。凡如
是者十餘通。以明古今禮俗不同。見虛辭說經之無
益。嘗言學者必悟經旨廢失之由。然後聖人本意可
見。若易象與春秋書法廢失。大畧相似。苟通其一則

可觸機而悟矣。又懼學者得於創聞。不復致思。故所著多引而不發。乃作易學濫觴。春秋指要。示人以求端用力之方。其於禮學。則謂鄭氏深而未完。王肅明而實淺。作禮經復古正言。如王肅混郊邱廢五天帝。併崑崙神州爲一。趙伯循言王者禘其始祖之所自出。以始祖配之。而不及群廟之主。胡宏家學不信周禮。以社爲祭地之類。皆引經以證其非。其辨釋諸經要旨。則有六經補注。詆排百家意義。則取杜牧不當言而言之義。作翼經罪言。近代覃思之學。推澤爲第。

一吳澄嘗觀其書。以爲平生所見明經士。未有能及之者。謂人曰。能言距楊墨者。聖人之徒也。楚望真其人乎。然澤雅自慎重。未嘗輕與人言。李洞使過九江。請北面弟子受一經。且將經紀其家。澤謝曰。以君之才。何經不可明。然亦不過筆授其義而已。若余則於艱苦之餘。乃能有見。吾非邵子不敢以二十年林下期君也。洞歎息而去。或問澤自閔如此。寧無不傳之懼。澤曰。聖經典廢。上闕天運。子以爲區區人力所致耶。澤家甚窶貧。且將老。不復能教授經。歲大侵。家人

採木實草根以療晏然曾不動其意惟以聖人之心
不明而經學失傳若已有罪爲大戚至正六年卒年
八十七其書存於世者十二三門人惟新安趙訪爲
高第得其春秋之學爲多

蕭軒

蕭軒字惟斗其先北海人父仕秦中遂爲秦中人軒
性至孝自爲兒時翹楚不凡稍出爲府史上官語不
合卽引退讀書南山者三十年製一革衣由身半以
下及卧輒倚其榻玩誦不少置於是博極群書天文

地理律厯算數靡不研究。侯均謂元有天下百年。惟
蕭惟斗爲識字人。學者及其門受業者甚衆。嘗出遇
一婦人失金釵道傍。疑剽拾之。謂曰。殊無他人。獨翁
居後耳。隨至門取家釵以償。其婦後得所遺釵。愧謝
還之。鄉人有自城中暮歸者。遇寇欲加害。詭言我蕭
先生也。寇驚憚釋去。世祖分藩在秦。辟剡與楊恭懿
韓擇侍秦邸。剡以疾辭。授陝西儒學提舉。不赴。省憲
大臣卽其家具宴爲賀。使一從史先詣剡舍。剡方汲
水灌園。從史至。不知其爲剡也。使飲其馬。卽應之不

拒及冠帶迎賓從史見斟有懼色。斟殊不爲意。後累授集賢直學士。國子司業。改集賢侍讀學士。皆不赴。大德十一年。拜太子右諭德。扶病至京師。入覲東宮。書酒誥爲獻。以朝廷時尚酒故也。尋以病力請去職。人問其故。則曰。在禮東宮。東面。師傅西面。此禮。今可行乎。俄除集賢學士。國子祭酒。依前右諭德。疾作。固辭而歸。卒年七十八。賜諡貞敏。斟制行甚高。貞履實踐其教。人必自小學始。爲文辭。立意精深。言近而指遠。一以洙泗爲本。濂洛考亭爲據。關輔之士翕然從。

之稱爲一代醇儒所著有禮說小學標題駁論九州志及勤齋文集行於世。

安熙

安熙字敬仲真定藁城人祖滔父松皆以學行淑其鄉人熙既承其家學及聞保定劉因之學心向慕焉熙家與因所居相去數百里因亦聞熙力於爲己之學深許與之熙方將造門而因已歿乃從因門人烏叔備問其緒說然因之爲人高明堅勇其進莫遏熙則簡靜和易務爲朱氏下學之功其告先聖文有曰。

追憶舊聞。卒竟前業。灑掃應對。謹行信言。餘力學文。窮理盡性。循循有序。發軔聖途。以存諸心。以行諸已。以及於物。以化於鄉。其用功平實均密。可謂善學。朱氏者。熙遭時承平。不屑仕進。家居教授垂數十年。四方之來學者。多所成就。旣歿。鄉人爲立祠於藁城之西。筦鎮其門人蘇天爵爲輯其遺文而傳之。

愚按許魯齋劉靜修吳草廬三子。出處之概。先儒旣論之詳矣。夫吳固不足道。許則僅優於吳。而劉亦未大過乎許也。劉之渡江一賦。恐許吳未必有。

爲而晚節却聘之書卽其敘述生平亦非能超然高蹈者綱目書右贊善大夫劉因卒其義可見矣或曰薛文清嘗極稱魯齋至以爲善學孔子歐陽圭齋贊靜修則比之漢四皓魯兩生嘆爲宇內不常有之麟鳳然則二子之說並非耶曰文清之言畧其迹而原其心者也顧心與迹有二耶若圭齋之贊殆所謂史氏溢美者也又烏足信乎蒙古之世學行出處皜然無可議者惟金仁山許白雲以下數子而已嗚乎仁山白雲尤不可及也哉尤不

學統
可。及。也。哉。

卷之四十一終

學統卷之四十一終

學統卷之四十二上

孝昌熊賜履敬修甫編

附統

朱善

朱善字備萬豐城人九歲通經能文元末隱居纂述孝事繼母高帝既定天下設學校時豐城尚爲富州州守強憲中請善爲訓導南昌守許方復聞善於朝授郡教授洪武八年徵赴京廷試第一除翰林修撰署院事兼知制誥以奏對失旨改典籍復謫教遼東

行至徐州妻卒。藁葬路傍而已。尋遇赦還鄉十七年。召授翰林待詔。上疏論婚姻律曰。臣聞國重世。臣家重世婚。今民間婚姻之訟甚多。兩浙江西尤甚。問之皆舅姑兩姨子。若女蓋以法不當婚。故爲仇家所訟。或已聘而見絕。或旣婚而復離。至婚嫁已久。兒女成行。有司尚爾逼奪。使伉儷分離。子母永隔。冤憤抑鬱。感傷嗟嘆。議律不精。禍一至此。按律尊屬卑幼相與爲婚者有禁。若謂父母之姊妹與已之身。是謂姑舅兩姨。皆名尊屬。已不可以卑幼匹之。若已爲舅姑兩

姨之子。彼爲舅姑兩姨之女。門地相耦。長幼相若。嫌靡尊卑。美儷鈞敵。爲子選婦。爲女選壻。宜莫先此。昔成周之時。王朝所婚。不過齊宋陳杞數國而已。故當時稱異姓大國曰伯舅。小國曰叔舅。列國之君。齊宋魯衛陳鄭秦晉亦各自爲甥舅之國。降及後世。如晉之王謝。唐之崔盧。潘楊之睦。朱陳之好。無不世婚。爲重其顯。然可證者。如溫嶠之玉鏡臺。此以舅子娶姑女也。呂榮公夫人待制張昱之女。而待制夫人卽榮公母之姊。此以小姨子娶大姨女也。若此律不明。獄

訟繁興風俗凋弊甚可傷憫願下臣奏議弛禁章帝
然之明年授文淵閣大學士帝與羣臣論治善曰致
治在任人擇衆賢爲耳目則視聽周任衆知爲計慮
則澤施溥今天下太平選任賢才宜畱聖慮他日講
心箴家人卦皆稱旨以疾告歸卒所著詩經解頤集
行世正德中賜諡文恪

曹端

曹端字正夫澠池人篤尚理學專靜研究座下著足
處兩輒皆穿父信佛見端居常言道時召問之端作

夜行燭書呈父言佛氏以空爲性非天命之性人受
之中也老氏以虛爲道非率性之道人由之路也其
言辨析甚精父好之卒向於學永樂中以鄉舉授霍
州學正以憂去服闋改蒲州考績吏部蒲霍二學爭
留之成祖以霍先竟與霍霍人服其矩矱不忍爲輟
疆餉負監臨大吏過者敬謁請益不敢屬僚畜之尋
卒於霍貧不能歸葬遂葬霍正統中僉事張敬建祠
於澠池後有黃編修者謁祠詢端墓所在遂捐貲屬
縣令改葬於澠池端所著有四書詳說太極圖通書

西銘釋義經述解性理文集儒家宗統譜家規輯存
疑錄及夜行燭諸書彭澤曰我朝一代文章經濟莫
盛於宋學士劉誠意道學之傳斷自澠池始也

吳訥

吳訥字敏德常熟人自少穎敏七歲能背誦五經及
長博洽羣書永樂間以儒士薦至召入便殿奏對稱
旨留侍闕廷洪熙元年侍講學士沈度復薦訥經明
行修授行在湖廣道監察御史出巡浙江揆諮吏治
赫然有聲仁和邑庠有宋高宗御書九經論孟碑多

委布行路。訥拾湊全楷。置之殿廊。李公麟畫聖賢像。有秦檜爲記。磨而削之。表陸贄奏議。修岳飛墓祠。議論舉措。有前賢風。繼巡貴州。恩威竝行。宣德五年。陞南京右僉都御史。尋陞左副都御史。居臺十餘年。敬慎廉直。以老乞致仕。宴勞遣之。訥之學。由博入約。自體達用。以行誼爲先。至其爲文。根柢羣經。波瀾遷固。談及淺學。後進曰。此韻府羣玉。秀才無足道也。訥著有思菴集。小學集解。性理羣書補註。而所輯文章辨體鑒別精詳。正統中。知縣蔣忠言訥學行醇正。著書

立言深通治體。宜徵赴禁密。以備顧問。訥年八十餘卒。鄉人以列於言。偃祠。追諡曰文恪。

李時勉

李時勉名懋。以字行。安福人。少稟秀異。勵志顏曾。舉永樂二年進士。是歲進士額舉四百七十三人。號爲特盛。成祖命解縉選其英敏者二十八人爲庶吉士。讀書文淵閣。以應二十八宿。時勉在選中。旣與修太祖實錄。書成。自刑曹改翰林侍讀。三殿災。詔求直言。時勉同侍講鄒緝具疏。略曰。臣惟陛下敬天勤民。至

切至深。羣臣奉行或失初意。下民失所。怨譴上興。皇
天眷懷。遂加譴罰。臣有所見。不敢匿隱。臣竊惟陛下
嗣紹高皇帝統緒。建立北京。焦勞聖慮。幾二十年。本
所以爲子孫不拔丕基。天下萬民尊仰之根本。然肇
建以來。工巨費大。羣臣不能深體聖心。致措置失宜。
陪克蠶食。征需無藝。夫衣食者民所賴命也。百萬之
衆。終歲在官。旣不得遂。其父母妻子樂生之心。使畊
種失時。農蠶廢業。猶且征求益深。所取無極。至於輸
桑。棗以供薪爨。剝桑皮以爲楮料。而衣食罄矣。加之

官○司○胥○吏○橫○徵○暴○斂○日○甚○一○日○大○率○費○數○萬○貫○而○不○
足○供○一○柱○一○椽○之○費○夫○京○師○天○下○根○本○人○民○京○師○根○
本○也○人○民○安○則○京○師○安○京○師○安○則○國○本○固○而○天○下○安○
自○然○之○勢○也○自○營○建○以○來○羣○輩○工○匠○假○托○威○勢○驅○迫○
移○徙○號○令○方○出○屋○宇○已○摧○孤○兒○寡○婦○哭○泣○叫○號○寒○暑○
暴○露○莫○能○自○蔽○倉○皇○別○徙○輿○突○初○完○又○復○重○驅○莫○知○
所○向○此○皆○陛○下○之○所○不○知○而○京○師○人○民○不○無○怨○讟○者○
也○貪○官○污○吏○徧○布○內○外○朝○廷○每○一○差○遣○卽○是○其○人○養○
活○之○計○州○縣○官○吏○賄○賂○公○行○逢○迎○恐○後○間○有○廢○興○

守不爲承應還命之日。卽罹讒毀。無以自明。是以在外藩司而下。聞有差遣官至。望風應接。剝下媚上。有同交易。夫小民所積幾何。內外上下。誅求如此。今山東河南山陝諸處。水旱相仍。至剝樹皮掘草根爲食。老幼流移。顛踣道路。而京師之內。聚集僧道幾萬餘人。日食廩米。皆百餘石。猶且徭役不息。征歛不休。此皆耗蠹以養無用者也。報效軍士。朝廷厚與糧賜。使之就役而游行往來。恣橫擾害。是乃奸詭之人。懼還原伍。科徭不堪。假圖規避。豈真有報效之心。可任用。

者哉。朝廷歲令有司織緞鑄錢。賣往外蕃。買馬收貨。所出以數千萬。而所取曾不什一。夫錢出口。國自昔有禁。竭天下所有以與之。可謂失宜矣。昔晉武帝徙口內地。卒致亂。口今入貢。口人皆窺覘虛實。圖便利者也。乃使羣居輦轂鞍馬弓矢。牛羊衣服盛供。帳厚賞賚以待之。此益足明廣大耶。至於宮觀禱祠。蠹財妄費。亦其一端。夫奉天殿者。陛下正朝之殿也。災首及焉。自非省躬責已。改革政化。疏滌天下窮困之人。曷回上天譴怒之意。臣願陛下駕還南京。奉謁峻廟。

告以災變。保養聖躬。休息於無爲。散遣營造工匠。停止徵派役作。蠲除租賦。賑濟饑荒。勿聽小人重勞天下。罷絕禱祠。禁遏僧道。除下蕃買馬之役。四彝朝貢。賜賚遣之。勿復容畱。沙汰冗濫。覈盡懲貪。獎廉能之吏。重陞擢之賞。夫國家所恃長久者。天命與人心也。而天命嘗視人心爲去畱。欲得人心。必敦教化。必修禮讓。必遂其生養。必足其衣食。使其知父子君臣之義。被道德仁義之化。休養田里之間。不見貪殘虐害之政。將災沴不作。太平可臻。臣不勝惓惓惟陛下少

垂聽鑒。時成祖定都北京。已決方招撫外口。疏中所陳業忤帝意。然尚允行其他項之坐。謫下獄。尋赦出。不敘。永樂末年。以楊榮薦復職。仁宗卽位。屢敕羣臣言事。時勉復獻書二本。條舉時政。帝怒。縛至便殿。命武士撲之。金瑤十八肋折者三。尋改爲御史。今日問囚一起言事一章。章三上。復有規切語。帝謂夏原吉。李時勉。廷辱我言已。顏色大變。原吉言。時勉小臣。廷諍過激。顧反見聖德之大。帝下時勉錦衣獄。其夕帝崩。宣宗卽位。命縛見必殺之。已命卽斬西市。母見使。

者傳命出端西旁門。縛者從端東旁門入相左。遂得見帝。問爾何觸悟先帝。疏何語具數之。時勉數至六事。少止。帝曰。未盡。胡止。對曰。天威在上。臣不能悉記。帝稍霽。曰。是第難言。爾草安在。對曰。已焚。遂釋之。命預修兩朝實錄。書成。陞侍讀學士。帝至史館。撒賜金錢。諸學士皆俛取。時勉獨正立。帝使前出。餘錢賜之。他日至文淵閣。賜諸學士酒。帝顧時勉曰。朕非卿安能飲。此時勉頓首謝。正統初。爲國子祭酒。故事中官進書文廟。祭酒設茗延欸。時王振用事。時勉殊不往。

侯故已銜之。及其進書。又罷茗不設。羹餼倫堂前有樹。故是許平仲手植。樹蔭翳堂。時勉芟其旁枝。振因言。時勉擅伐官樹入家。取中旨。與司業趙琬並枷脰。國子監前錦衣校尉至。時勉方閱課。卽起免冠受縛。徐呼諸生前品第。其高下顧僚屬更校。乃去。是時天方暑。柳三日不解。合監生徒三千餘人。周旋左右。一生石大用者。豐順人。見時勉老頓。具疏請代。奏入。會時爲會昌侯生日。諸公皆過侯家。爲壽助教李繼雅往。來諸公間。於是因諸公求侯。太后正使人賜侯家物。

侯附奏太后遂得解。正統八年也。時勉爲祭酒。凡六年。規條嚴肅。恩意稠至。諸生疾病。或不能婚喪者。扶持贍給之。亡何乞致仕。合監生徒。旗帳鼓吹。送出都門外。傾朝出餞。商賈爲之廢市。廷臣歸老之榮。師生相與之厚。一時傳爲盛事。歸之明年。聞車駕北狩。痛憤累日。遣其孫騏詣闕上書。溫旨褒諭。時勉已卒。景泰中。江西巡撫韓雍爲請贈諡。下禮部尚書胡濙等。言諡有美惡。所從來已。我朝特與善諡。蓋待臣子以善。善長之意。比者周忱。徐琦。陳鑑。皆以大臣得賜善

諡如時勉者官雖不過四品而學行節槩出三臣上
宜如雍請遂諡時勉文毅成化五年其孫顥請視吏
部侍郎曹鼐例改諡加贈帝以時勉先朝遺直易以
忠文贈禮部左侍郎云

陳敬宗

陳敬宗字光世慈谿人父孟藻令德興有聲敬宗永
樂二年進士被選爲翰林庶吉士預修永樂大典授
刑部主事復預修五經四書性理大全重修高廟實
錄旣成改翰林侍講尋以母喪歸宣德改元驛起修

成仁二廟實錄。陞南京國子監司業。進祭酒。敬宗高
明。力學教人。持敬爲主。規條整肅。辟雍之政。辨於朝
常。咸寧人楊鼎年二十餘。舉鄉試第一。聞敬宗嚴教。
卽求入南監。從敬宗學。閉戶讀書。爨食躬作。敬宗嘆
曰。顏氏簞瓢。不是過矣。時禁夜燈。國學尤嚴。鼎竅小
鬕。照誦爲微者所發。而敬宗特貸之。時鼎尚未有室。
有郡守欲妻以女。鼎曰。遊學在外。不告父母。不敢從
也。敬宗聞之。益服鼎第其德行爲國學。最後鼎竟至
大官。正統中。敬宗考績赴京。王振慕而求見。敬宗辭。

避○之○楊○士○奇○請○聞○過○於○敬○宗○敬○宗○直○語○焉○士○奇○謝○曰○
公○真○吾○師○也○在○職○十○九○年○所○教○生○徒○多○位○卿○貳○而○敬○
宗○不○調○時○李○時○勉○爲○北○監○祭○酒○而○敬○宗○在○南○監○人○稱○
南○陳○北○李○云○敬○宗○廣○眉○修○髯○儀○觀○儼○然○動○止○有○常○一○
語○不○妄○片○章○尺○楮○皆○關○名○教○景○泰○元○年○引○年○致○仕○家○
居○不○輕○出○入○被○其○容○接○者○莫○不○興○起○天○順○元○年○卒○年○
八○十○三○嘉○靖○中○贈○禮○部○侍○郎○謚○文○定○

魏驥

魏驥字仲房、蕭山人、父希哲、洪武中薦知上高縣、鋤

強扶弱德。威竝著。驥以鄉貢士登永樂四年會試乙
榜。授松江府學訓導。尊嚴師道教。而且愛學舍諸生。
有夜讀者。身攜茶粥往慰厲之。滿九載。考諸生諸闕。
乞畱復任三載。召修永樂大典。以吏部尚書師達薦。
爲太常博士。成祖曰。劉履節九年御史。先帝方授此
官。命從北征。宣宗元年陞行在考功員外郎。轉南太
常少卿。正統三年。召試行在吏部左侍郎。踰年實授。
驥爲人好分別是非。或時面折人。而當官廉勤。祇慎。
雖王振亦重之。嘗遇振於塗。不避車。贊振方帕而已。

居官舍第。攜一蒼頭。他日帝御便殿。召問孰爲吏部侍郎。驥前對。帝問驥事。從容陳奏。帝慰是之。驥被命往南京考察所。羸俸金。臨行莫寄頓。有里中同年子。爲刑曹郎。便送付之。不復識鑰。郎請驥。佛然曰。何待前輩之薄也。郎有女壻。從郎官如其輕重。賈易之。比歸。召工鑿金。金則賈驥嘆息而已。工私驥。蒼頭曰。向有某官舍人託我爲賈金。無是耶。蒼頭入告。驥曰。毋洩。盜亡金。豈可失驥已。郎出知郡。謁驥求教。驥曰。君爲人練事。治司空城旦書。精審何郡足爲第。須簡勅。

舍中雖在至親不可易。忽郎居念驥言已。郎舍中人稍稍露女壻。屬金事郎大驚。及入覲。如數償驥。驥駭不受。曰金具在。無易者。驥爲人長厚。類如此。八年以老辭。調禮部。特改南吏部。九載入見。乞致仕。不允。陞南吏部尚書。已巳之變。率諸司條陳討賊策。畿內瑞麥白兔之祥。悉却弗奏。天旱命恤刑。有男子某呼冤。法司以其年少。欲緩之。驥曰。閱獄辭巨。憊也。天旱正爲此。何得姑息。爲獄決而雨。景泰元年至京。引年請老。大學士陳循驥門生也。詣驥曰。請需之。亡何且以。

北家宰處先生驥曰君位輔臣當進賢爲天下奈何
私我耶竟致仕去去乘小舫時阻於津關其子稍立
仗舫頭驥曰藉重此耶命去之居家二十年時首筮
課田與傭畷雜處嘗至郡城舫衝官舟官問之從人
曰魏公也官不審驥曰第應之曰魏驥尚不審驥曰
第應之曰蕭山魏驥不言尚書也年九十八卒先十
日大星隕其鄰驥就枕口占曰平生不作欺心事一
點靈光直上行遺書子完勿請營墳擾勞鄉里旣卒
而復言辭不亂倏然就化是爲成化七年先是監察

御史梁昉疏驥有德有壽請如漢故事優禮之憲宗
命禮部遣行人存問賜羊酒有司月給米三石勅未
至驥已卒有司業得請如例祭葬營墳之使來驥有
老妾趣完曰而亡父言乎完詣闕辭免帝若曰老臣
清儉身後尚爾遂許辭驥樸不勝衣而好學不厭孝
友刑家信義重鄉居官爲良吏典教爲明師門生舊
屬多有顯人達官自餘方州學職不可勝數知縣李
輩爲請謚特謚曰文靖

周桂

周桂字廷芳秦州人爲臨洮衛軍士戍蘭州年二十
聽人講大學首章奮然感動聞段可久集諸儒論學
時往聽焉可久勗以聖賢可學而至教示方途遂究
通五經篤信力行存省真純發言不妄見者稱曰濂
洛關閩君子也諸儒初猶與坐講旣尊爲畏友遂爲
遠○通○道○宗○西○安○李○錦○薛○敬○之○咸○信○重○之○恭○順○侯○吳○瑾○
鎮○陝○是○爲○本○軍○總○兵○延○桂○訓○子○累○請○不○赴○曰○本○軍○見○
役○死○不○敢○避○若○欲○訓○子○禮○無○往○教○瑾○始○令○子○就○學○後○
移居其州之小泉深衣幅巾動必以禮成紀之人薰

化其德而可久時時過訪之時論廷芳之於可久始
若張橫渠之於范仲淹後若朱紫陽之於蔡元定也
迨老以父雲遊四方訪求不遇卒逆旅舍而遺風餘
韻猶在隴西間

劉觀

劉觀字崇觀吉水人少有巨人志既就傳子史經傳
靡不貫淹下筆逸邁常屈其名宿正統中舉鄉試第
一明年登進士以疾告歸尋丁內艱除服遂堅臥不
起脫粟漚袍質行終身每旦祇謁先聖畢卽凝坐一

學統

朱之四十三

上

古

室養性讀書四方來學隨才造就縣尹劉晟爲築書
院於虎邱山題曰養中所居四壁書儒先入德造道
之方左右列責志恒心二圖爲誠明敬義四箴以自
警嘗言小學一書老不可離又言朱文公之言尊信
之足矣吉中先後三儒孫鼎李中而觀尤篤行吉中
稱鼎曰貞孝先生中曰谷中先生而稱觀曰臥廬先
生

吳與弼

吳與弼字子傳崇仁人唐吳兢後也父溥國子司業

剛介自守。與弼隨宦京師。年十八九。讀孟子章句。見
朱子以程子繼統於終篇。嘆曰。聖道寥寥。一至於此。
已。讀程子少有獵心。奮然曰。大賢亦嘗有過。人固資
學。遂一意斯道。作勵志詩。自警。登樓誦讀。足不下樓。
者一歲。溥使歸娶。旣娶之後。共往謁父京師。然後敢
同室。人皆迂之。溥友人孔諤謂溥曰。與阿弼譚有富
貴。不淫貧賤不移之象。今雖見迂。後當大顯。與弼強
毅堅忍。痛自浣厲。恒念學之無成。道之不立。至於中
夜奮興。展轉達旦。其服膺孔子朱子之爲人寤寐見。

之昨非今是。日改月化。日進而無疆者也。所讀書小
陂種湖二處。畊牧之事。皆身親之。或在田間。或在枕
席。默誦精思。暇則彈琴詠詩。鳥明花發。有鳶魚風雩
之象。開館授徒。却其束脩。而皆取其有志聖人之道
者。其教人由涵養以及致知。先據德而後依仁。啓勿
忘勿助之訓。悟無聲無臭之妙。而窺其闕者少矣。正
統十一年。江西按察僉事何自言。上古有國家
者。必有懷抱才德。不屑進取之士。如漢之周黨。宋之
種放。邵雍。孫復。當時咸加褒贈。以勵風節。竊見崇仁

縣儒士吳與弼守素尚義好古通經上無所傳聞道
甚早待妻子如賓客視財利如鴻毛年過五十不求
聞達弟子樂從鄉人敬式真儒林之清節聖代之逸
民乞勅取到京授以文學高職如不願仕量與褒嘉
亦足敦勵風操景泰中監察御史涂謙陳述撫州知
府王宇先後列薦兩召不起嘆曰宦官釋氏不除欲
天下治難矣英宗時石亨專擅干請朝議不厭欲借
寵賢德以釋衆望復以爲言英宗使行人曹隆齎勅
往聘與之偕來時年六十八矣旣陛見帝口授左春

坊左諭德朝士悚然以爲盛事與弼疏辭並納還齋幣不許命學士李賢引見文華殿從容顧問辭職意與弼自言老疾不堪又不許命賜宴文華殿遣中使送紗羅羊酒薪米至其寓舍帝顧問李賢曰此老非迂濶者必令就職居數日召講中庸有御桃之賜與弼再疏辭請以儒冠入侍復請待病間一接秘閣羣書以益聞見帝皆不許初與弼以薦出石亨非其本意復幾左右顧問有所發明而帝必強之就職用是堅辭帝命賢諭意欲祿之終身亦終不受乃復遣行

人送還故里。賜銀幣。命有司。月給米二石。與弼上表謝恩。條陳十事而返。始與弼以誦讀道義。自強。常以克已安貧二事書壁。銘几。其讀朱子書。夜無膏至。傍爨光。冬夜用苧帳覆腹。斬然峻絕。郡邑藩臬有司。深加禮揖。一切辭避。迨朝命臨門。官吏師生皆來會集。鄉里聚觀。驚詫所居近山。天使經過。臨止。諸門生悉爲表易嘉名。與弼亦不覺震矜。既退。數念當時遭遇。形之詩篇焉。有弟嗜酒不飭。祖父田數畝。盡爲奪去。既歸。用其賜金墾田荒山下。以爲祭資。弟復謀斥賣。

與弼訟之。守守張瑣。驚物人也。致與弼於庭。與弼免冠束腰。以庶人禮見。張元禎聞而作書將告之。素王鳴鼓其罪。雖止不達。然與弼尋悔之矣。年七十九終。鄉人稱曰聘君。聘君沒百餘年。小陂人婦人不看行。男女不相授受。下戶民家皆頭巾衣履端拱。深敬人。以爲聘君之風云。

陳真晟

陳真晟字剩夫。泉州人。入戍籍於漳之鎮海衛。遂爲漳人。弱冠入長泰山中。從進士唐泰學。舉子業業成。

薦於有司。至省試。聞試防嚴。曰。非所以待士。士不宜
以此自待。遂棄歸。一意聖賢之學。初讀中庸。覺無統
緒。繼讀大學。乃知爲學次第。執以爲據。又讀大學。或
問得朱子主敬之說。曰。此大學基本也。求所爲敬。則
見程子以主一釋敬。而以無適釋一。遂推尋此心動
靜。求一以爲持。養工夫。曰。養一於靜。則客念不作矣。
持一於動。則外誘不奪矣。大學誠意一章。學者之鐵
門關。而主一二字。又此章之玉鑰匙也。又曰。人於此
學。誠真知之。則行在其中矣。然而氣質有偏勝。嗜欲

有偏重此聖門論學學問思辨之後加以篤行也天
順三年用程伊川故事詣闕上程朱正學纂要其書
首採程氏學制次採朱氏論說補正學工夫次作二
圖一著聖人心與天運次著學者法天之運次言立
明師補正學輔皇儲隆教本數事以終圖說之意書
未上先疏乞召見而後陳說不報書上下禮部復爲
當事者所寢歸家讀提學憲臣頒行敕諭教條有主
敬窮理修己治人崇正學廸正道等語喜曰此學較
正教也然學較旣崇正教則科舉宜定正考因採敕

論中要語參以程氏學制呂氏鄉約朱氏貢舉私議
作正教正未會通欲定考德爲六等考文爲三等爲
條例纂長書告當路諸君子當路漫不省真晟旣皆
無所遇聞臨川吳與弼欲往質之行至江西張元禎
止真晟宿叩其學大加稱許曰先生學得其真矣雖
不見聘君可也遂還自以布衣詣闕上書因以布衣
自號旣歿郡守彭桓立石官道傍表其墓曰大明闕
下兩上書請補正學泉南布衣陳先生之墓

羅倫

羅倫字彝正永豐人其先有開禮者仕宋宋亡提孤
旅赴難死而文天祥爲服喪倫莊重嚴毅居父母喪
甚謹踰大祥口始沾酸醎之味成化二年憲宗制詔
進士倫對策萬言不屬草引論人主當接引賢士大
夫不宜多親宦官宮妾中貴人往來視試趣納策倫
曰正及公等旣奏天子以爲第一授翰林修撰居數
月大學士李賢遭父喪憲宗用奪情故事使內臣持
詔畱賢倫詣賢所告止者三賢不能用時賢父八十
七歲而賢自其入仕違父者三十五年矣倫乃上疏

曰臣下才未學頃對大廷猥蒙選首常自感勵凡聖學君道之要朝政綱紀之端吏民風俗之敝兵戈饑饉之禍方欲提領疏目爲萬言書以獻以紓天下之望以酬陛下之遇顧筮仕未久諳練未深是以心雖懷憂口未敢吐近者李賢遭喪朝廷援楊溥故事下起復之命臣竊謂李賢大臣起復大事左右侍從給舍臺官必有正諫以扶綱常以植風化以竦天下後世之所瞻望乃率緘默因循至今臣今復不言是偷合苟容固非陛下求臣本心亦非愚臣報陛下夙願

也。臣伏讀陛下策臣有曰：朕夙夜拳拳，欲正大綱舉萬目，使人倫明於上，風俗厚於下。陛下此言，真可爲天地立民極，萬世開太平者也。然欲正大綱，莫先明人倫。厚風俗，明人倫，厚風俗。臣謂莫先於孝。夫孝，天之經也。地之義也。國非此不可，國家非此不可。家禮子有父母之喪，君三年不呼其門，所以教孝也。求忠臣必於孝子之門，未有不孝親能忠君者也。昔子夏問三年之喪，金革之事，無避禮與？孔子曰：魯公伯禽有爲爲之者也。今以三年之喪從其例者，吾弗知也。

陛下於賢以金革之事起復之與則所未聞也以國
家大臣起復之與則禮所未見也似與孔子之言不
類也似與陛下策臣初旨不合也夫爲人君者當舉
先王之禮以教其臣爲人臣者當據先王之禮以事
其君臣不暇遠舉請以宋論仁宗嘗用故事起復富
弼矣弼之詞有曰何必遵故事以遂前代之非但當
據禮經以行今日之是仁宗卒從其請孝宗嘗用故
事起復劉珙矣珙之詞有曰身在草土之中國無門
庭之寇難冒金革之名以私利祿之實孝宗不抑其

情○二○君○未○嘗○以○故○事○強○其○臣○二○臣○亦○未○嘗○以○故○事○徇○其○君○故○功○澤○加○時○名○聲○垂○後○無○他○君○能○教○臣○以○孝○臣○有○孝○可○移○於○君○也○自○是○而○後○無○復○禮○義○史○嵩○之○王○黼○陳○宜○中○賈○似○道○之○徒○率○皆○援○例○起○復○數○君○未○嘗○不○以○故○事○起○其○臣○數○臣○未○嘗○不○以○故○事○從○其○君○然○生○靈○以○之○困○天○下○以○之○亂○社○稷○以○之○傾○貽○禍○當○時○遺○臭○後○代○無○他○君○不○教○其○臣○以○孝○臣○無○孝○可○移○於○君○也○詩○曰○殷○鑒○不○遠○在○夏○后○之○世○陛○下○無○謂○廟○堂○無○賢○臣○庶○官○無○賢○士○陛○下○誠○於○退○朝○之○暇○清○閒○之○燕○略○崇○高○貴○重○之○

勢親直諒博洽之士講聖學之大要明君道之急務
詢政事之得失察生民之利病訪人才之賢否考
今之治亂諏風俗之盛衰容邊防之緩急見衆人之
見知衆人之知察佞順之言容忤直之諫則衆賢羣
策何必在賢又何待違先王之禮經拘先朝之故事
損大臣之名節虧聖明之清化然後天下可治哉朝
廷舉措大臣出處天下觀之史筆書之不可不慎也
夫先朝自楊溥而後未嘗起復某人爲某官也此海
以來朝廷以奪情爲常典縉紳以起復爲美名食稻

衣錦之徒。接踵廊廟。據禮守經之士。寥寥若塊。遵循故事。一何多耶。意其平時阿媚權勢。及遭通喪之時。則有曲爲諛說。以欺陛下。不曰有才可畱。則曰有例可引。一蒙俞旨。歡然就位。未有堅請如富弼懇辭。如劉珙者也。大臣起復。羣臣不以議。且從而爲之辭。羣臣起復。大臣不爲非。且從而成其事。互預已地。泆不忌慙。致有公無起復之例。私爲匿服之計。例在溥恩。匿服以受封。例在得官。匿服以聽選。例在掇科。匿服以應舉。例在轉官。匿服以候陞。例在求賄。匿服以之。

任聖人之世。綱常敝壞。一至於此。夫親愛之心。孩提
有之。短喪之說。下愚恥言。況列在冠裳。聞聖人之道。
者乎。願陛下斷自聖衷。許令李賢依富弼劉珙故事。
其餘已起復者。悉令追喪。未起復者。悉許終制。脫有
金革。亦從墨衰。朝廷端則天下。一大臣行則羣臣效。
綱常正。人倫明。而風俗厚矣。臣非不知臣言一出。忤
風。昔犯禮之人。不曰妄議。則曰迂譚。不曰求名。則曰
窒變。然臣區區之心。惟恐朝廷舉動。訾笑後世。是以
昧死爲陛下陳之。疏入。謫泉州市舶司提舉御史陳

選奏倫所言皆天理人心之不容已者國家所以教
臣子大本大慮也乞宥以彰聖朝孝思之治不報吏
部尚書王翱編修尹直詣賢所請如宋文彥博救唐
介故事賢謝不能用先是禮禁儻葛被旨起復或至
庶官天順間刑科都給事中喬毅等嘗言比來臣下
奔競亡恥目奪情爲能官笑終制爲不職子道旣虧
臣節安保宜究景泰時諸奪情起復官勒歸終制繼
今敢請彼此加罪至是倫雖見斥然始定令令百官
終喪而士之不言以養忠厚者亦爲一變云居三年

名倫還復修撰。改南京名重一時。尋辭疾隱金牛山。山中與樵牧往來授徒。註經時。飯客無宿儲。妻子貧。隣家乃可爨。進賢令呂某聞其困。分賙以堂食錢。友人梁侃曰。公而受有司餽乎。倫欣然却之。居數年卒。倫自少力學。非聖賢之說不講。動靜語嘿一循乎禮。惡衣惡食。無所恥醜。與人子言依孝。與人臣言依忠。與居官者言民所疾苦。如其自身見善加愛。嫉惡加嚴。道傍遇死人屍。至解衣覆之。其立心嗜義。毀譽欣戚。死生禍福。皆所不顧。所交皆一時豪傑之士。無導。

於前而所立卓然世宗卽位以御史唐龍言贈倫左春坊左諭德賜諡文毅

章懋

章懋字德懋蘭谿人成化二年舉禮部第一登進士選庶吉士逾年除編修與羅倫黃仲昭賀欽莊杲陸克深謝文祥鄭克修爲同榜以名節相激勵是時倫爲修撰仲昭爲編修杲爲檢討其冬命詞臣預撰明歲元夕煙火花燈詩懋與仲昭杲上疏曰切惟某月日內閣遣郎中某持小揭帖到東閣及史館分與翰

林諸臣令各賦煙火花燈等詩。備明歲上元賞翫者。臣等伏觀陛下卽位之初。首下溫詔。赦田租。絕貢獻。蠲逋負。停不急。與民息肩。天下欣然。頃因災異。敕諭羣臣。同加修省。目擊耳聞。拜手稱頌。以爲陛下真游心經術。邁跡堯舜。今諦觀煙火花燈諸詩。舊式率多鄙褻之語。安燕之詞。臣等復賦。諒不出此。輒相私語。陛下聖明。所不畱情。或者以歡宴兩宮。助孝養萬一。臣又伏見兩宮母后恭儉慈仁。著聞中外久矣。今者兩廣弗靖。四川未寧。遼左雖云告捷。敵情尚難測量。

北口毛里孩蛇豕窺測。江西旱乾數千里。其他災傷之處。未能悉數。雖蒙詔卹公私。匱乏殊可寒心。此陛下宵旰焦勞。兩宮母后同憂之日也。翰林之官。論思爲職。宣宗章皇帝御製官箴有曰。啓沃之言。惟義與仁。堯舜之道。鄒孟以陳。若以燕樂鄙褻。進之君上。曲引蘇軾宋祁教坊致語爲解。是不以仁義堯舜望陛下也。伏願採芻蕘之言。端耳目之好。移此視聽爲文。如傷爲舜。如決省此冗費。以活流離。以賞勞役。書曰。不矜細行。終累大德。又曰。不役耳目。百度惟貞。惟陛下

下深思力行書奏帝曰元宵張燈儒臣應制歷代故事朕已減舊但取上奉兩宮何至妨政害民懋等妄言譏議其杖而調之外職於是懋調臨武知縣仲昭湘潭知縣杲桂陽州判官未行明年正月刑科給事中毛宏等言三臣初出草茅敢言直諫實盛世事乞復其職特旨改懋南京大理寺左評事仲昭右評事杲南京行人司左司副蓋是時懋等除官纔四十日爾京師稱三君子而羅倫以論李賢坐謫又通稱翰林四諫云懋爲司副一考遷福建按察僉事通商便

民救荒除盜。泰寧縣盜發。假托行部至縣。使知縣王
佐招諭。降其脇從者數千人。皆解。同僚有言。部使懋
儒學。不知兵。願自行勦之。部使使其僚往。則已平。乃
悉戮。招降要功。懋恥與爭。絕口不道。考績赴部。以親
老乞休。吏部尚書尹旻慰留之曰。按君之年。四十有
一。爾不犯罷軟。不犯貪酷。不犯年老倏然求退。以何
爲名。懋曰。古人正色立朝。懋可考。罷軟。古人一介不
取。懋可考。貪。古人視民如傷。懋可考。酷。懋年未艾。鬚
髮早斑。可考。老疾。旻撫然驚嘆。爲奏得請。懋平生學

問尊稟朱程無敢悖異於鄉郡前儒何基王柏金履祥許謙深所企仰既歸奉親讀書畢心自得弟子執業四至餉之蔬飯而已家居二十餘年薦牘無虛宏治十二年召謝鐸爲北祭酒居二年召懋於南京懋時遭父喪力辭詔增司業員虛席以待終制赴官一時南北祭酒鬱然相望懋作率南士開示近裏見若無奇至其論說理道探幽索隱經史儒書一舉成誦時有論難若莛撞鐘談天下古今事若身處分其虧成然後知其於書無所不讀天下事無所不理會也

至其祁寒暑雨衣冠終日六館之士儼然畏之正德
元年上言治道五事再疏乞休未允滿三載引年不
待報去前後八疏始得請五年陞南京太常卿尋陞
南京禮部侍郎皆不赴十一年南京禮科給事中徐
文溥言邇來儒學不明巧僞險怪誹侮先儒罔惑人
心變制巾服標張門戶竊見致仕禮部侍郎章懋精
深純粹誠心正學不求表異海內學者翕然宗師臣
切見先朝吳與弼陳獻章皆用大臣論薦崇之殊禮
今如懋者皇上用之太常陞之禮部亦不爲貶臣獨

謂二臣布衣也。先朝崇禮如此。其隆今亦宜近舉。先朝之典。遠倣三代養老之政。或遣使存問。或安車徵起。以昭異數。以光聖德。巡按浙江御史鮮冕亦以爲言。吏部議覆。詔懋學純行正齒高望重。有司時加存問。以稱朝廷優禮耆宿之意。世宗卽位。懋年八十六。特陞南京禮部尚書致仕。尋賜璽書存問。使者及門。懋已疾亟。旣卒。贈太子太保。謚文懿。金華知府王九臯奏懋清修苦節。遺孤貧困。命月給米二石。懋通籍六十年。官僅三考。立朝僅四十日。城府不見其跡者。

四十年粹中貞恪歆動一世表律天下楊廉稱之曰
在漢東都不爲危言之叔度在宋鷺湖不立異論之
伯恭懋子孫皆天歿年八十一始生子接詔錄爲國
子生。

陳選

陳選字士賢臨海人宋國子司業左輔之後父員韜
以進士宰新城爲御史巡按福建遷廣東布政使所
至清慎慈惠餘思在民選自少沉靜端慤不妄言笑
天順四年試禮部考官邱濬讀其文力置第一曰必

古○君○子○也○及○見○貌○頗○不○揚○濬○益○喜○曰○聖○賢○不○相○既○成○
進○士○授○監○察○御○史○出○按○江○西○藩○臬○有○過○自○傳○紉○者○選○
與○語○曰○悅○不○以○道○選○不○願○也○成○化○初○修○撰○羅○倫○謫○官○
選○獨○疏○申○救○學○士○倪○謙○自○戍○所○得○復○陞○爲○禮○部○侍○郎○
抗○章○極○論○之○復○劾○奏○兵○部○尚○書○馬○昂○及○諸○大○臣○之○不○
職○者○既○改○提○學○南○京○先○頒○冠○祭○射○儀○於○學○宮○歲○時○肄○
習○既○至○徐○行○締○視○周○旋○磬○折○絃○管○豆○登○洋○洋○翼○翼○遂○
居○宿○學○宮○中○夜○則○以○二○燈○前○導○巡○行○誦○讀○兩○廡○燈○燭○
如○晝○吾○伊○不○絕○選○教○人○必○本○小○學○灑○掃○應○對○以○逮○於○

六經以及通書西銘皇極經世太極圖其自爲禮創
東西階舉足先後造次不爽除卷牘糊名之舊曰已
不自信奈何信人提學三年變色之語不見於章縫
折箠之笞不加於輿皂而人畏如神明遷河南按察
副使尋改河南提學汪直被命出巡都御史以下跪
伏趨拜選徐入長揖直曰君何官耶選曰提學副使
直曰能大都御史耶選曰提學何可比都御史也業
忝人師不敢先自詘辱選詞氣嚴正舉止安詳會諸
生從者儼集署外直亦遂好語曰先生公務旣無相

涉後毋勞枉也。既八年轉按察使。仍河南首釋淹囚。除罷諸弊名舊規者。其爲政一從簡易。顧獨於賊吏無所貸寬。聞母喪還。士民泣送立祠服除。擢廣東右布政。踰年轉左。選在官坐堂上。令輿隸別之。閑處分治生業。不廢。使令民告狀者。予一票。令持示所告家。使自來請立替。適道振鐸以徇社村子弟。擇鄉祭酒長者教之。嶺南苦鎮守中官。瓊儋騷然。選嚴條約革和買減泛役。掌市舶太監韋眷者。掎剋供辦。奏乞均徭餘戶添採方物。選因詔書減省貢獻。請悉停罷。雖

不盡行。亦得減半。番禺知縣高瑤發眷造私船通番。沒其貨鉅萬。都御史宋旻等皆不敢詰。選移文獎之。番人馬力麻詭稱蘇門答刺國來販海。眷利珍奇。將許之。選發其僞。立逐去。撒馬兒罕使臣怕六灣者。自甘州以獅子入貢。取道廣南。浮海歸。又云。將從滿刺加更市。進選上疏拒止之。選旣阻。眷非一會其年。嶺外地震。水溢。撫按藩臬殊不涉心。選從便宜發倉賑。民眷因累舉前事奏選。比昵縣令。和同貪墨。發倉擅賑。希望侵欺。朝命遣刑部員外郎李行會巡按御史。

徐○同○愛○鞠○選○同○愛○畏○眷○不○敢○反○異○選○有○所○黜○吏○張○聚○
意○其○怨○選○逼○令○誣○証○聚○堅○不○從○同○愛○執○聚○拷○掠○數○百○
乃○枉○判○選○如○眷○所○奏○坐○罪○當○徒○詔○奪○選○官○遣○錦○衣○千○
戶○逮○繫○之○士○民○要○遮○數○萬○錦○衣○校○尉○大○用○辟○除○乃○得○
出○州○行○至○南○昌○病○發○行○阻○其○醫○藥○竟○卒○旅○舍○行○復○使○
其○養○子○密○走○報○眷○曰○陳○選○死○矣○時○南○昌○人○張○元○禎○以○
翰○林○家○居○治○選○殮○裝○之○疏○綌○曰○陳○公○清○儉○絕○衆○殮○以○
時○服○於○是○爲○宜○而○張○聚○同○逮○至○京○從○獄○中○上○書○曰○臣○
聞○周○公○四○國○之○謫○上○疑○於○君○曾○參○三○至○之○言○內○搖○其○

母豈成王不明。曾母不親哉。口能鑠金。毀足銷骨也。竊見故罪人陳選。夙崇正學。一蘊孤忱。子處羣邪之中。獨立衆憎之表。太監韋眷通番敗露。知縣高瑤按法持之。選移文獎借。誠賢監司。激懦懲貪之善舉也。宋旻徐同愛怯勢。首鼠致眷橫行胸臆。穢蠚清高。勘官李行。頤指鍛鍊。竟無左證。臣本小吏。詿誤觸法。被選黜罷。選無他心。臣甘沒齒。眷意臣憾。選厚賂。啗臣臣。雖胥役。寔敢欺喪。眷知臣不可搖誘。嗾行等逮臣。致理拷掠。彌日。臣忍死無異行等。乃依傍眷語。文致。

其詞必如所云是毀共姜爲徵舒詬伯夷爲莊驕也
選故剛正屈辱不堪憤懣旬日嬰疾而斃李行幸死
阻其醫療訖命之日密走報眷小人佞毒一至於此
安取爲天子郎官司寇曹僚臣擯斥罪餘秉耒田野
百無所圖誠痛忠良銜屈而慮聖明長奸冒命披陳
尚冀天日不報竟以他事罷眷鎮守選平生自待古
聖賢其學以克己求仁爲要潛修嘿會不求人知所
服惟先人故帶每食飯一盂韭數根或雞子半枚而
已河南奔喪牛車一輛之官廣東騎驢出都門道而

學錄 卷之四十一
提學南京時韓雍家居亦自減其騶從云宏治初工部主事林沂上疏追理選冤頌其平生詔復官禮葬之正德中追贈光祿卿謚忠愍

邱濬

邱濬字仲深瓊山人其先晉江人元季有官瓊者因家焉祖普性有陰德爲良醫濬幼孤嗜書或從市肆借讀或從親友訪求假抄聞有積書之家必豫計內交有遠涉數百里轉挽至數十人積久至三五年而後得者甚至爲人所厭薄厲聲色相拒其顛篤如此

正統九年鄉貢第一。卒業太學。祭酒蕭鉉深重之。景泰五年試禮部學士。商輅閱策。意爲濬揭之果然。廷試以貌寢寘二甲第一。首選翰林庶吉士。濬以海外孤生。躡取清華。益讀未見書。究心本朝文獻。旣撤館。授翰林編修。天順以來。兩廣蠻賊猖獗。朝命總兵楊彪都御史葉盛討之。不能平。憲宗初使都督趙輔叅政韓雍往代濬。奏記大學士李賢。大約言用兵之策有二。曰逐曰困而已。廣東賊當用逐。廣西賊當用困。妮妮千餘言。賢善其策。以轉聞帝。嘉納之。命錄示總

兵巡撫卒用破賊九載秩滿陞侍講與修英宗實錄
成陞侍講學士濬在講筵雖貌不揚而音吐洪暢憲
宗悅之累進翰林院學士國子監祭酒加禮部侍郎
仍掌監事濬慎取與恬仕進富於見聞是非臧否常
與人各趣又能以辨博濟其說人莫敢難者至於奏
對敷論之文引經證史條達詳明讀者知其爲有用
之儒也宋真德秀大學衍義舊至修身齊家而止濬
更採集子史經傳有益治國平天下者附以已見爲
百六十卷凡列十二目詳列百十九目曰大學衍義

補○又○以○成○天○下○之○務○易○教○先○幾○更○條○四○目○曰○謹○理○欲○
之○初○察○事○幾○之○萌○防○姦○邪○之○漸○炳○治○亂○之○朕○總○而○曰○
審○幾○微○自○爲○一○卷○以○首○補○誠○意○正○心○之○要○孝○宗○嗣○位○
溶○書○適○成○表○上○之○帝○深○嘉○悅○賜○白○金○二○十○兩○紵○絲○二○
表○裏○陞○禮○部○尚○書○掌○詹○事○府○事○命○錄○付○書○坊○刊○行○亡○
何○命○克○副○總○裁○官○修○憲○宗○實○錄○以○老○乞○休○令○朔○望○朝○
參○以○終○史○事○四○年○實○錄○成○加○太○子○太○保○遂○令○兼○文○淵○
閣○大○學○士○時○年○七○十○一○矣○三○疏○固○辭○末○疏○言○皇○上○處○
臣○內○閣○不○允○臣○辭○念○臣○之○壯○也○亦○欲○有○爲○今○老○矣○聞○

久○歷○多○始○知○天○下○事○思○之○非○不○爛○然○第○恐○行○時○不○如○
言○時○人○心○不○似○我○心○臣○所○進○大○學○衍○義○補○平○生○精○力○
盡○在○倘○聖○明○採○一○二○於○十○百○之○中○見○諸○施○行○雖○不○用○
臣○如○實○用○臣○不○許○既○就○位○復○言○大○學○衍○義○補○一○書○臣○
所○竭○思○盡○忠○搜○古○鑒○來○非○如○鄭○康○成○之○訓○經○義○泛○濫○
無○裨○王○安○石○之○假○經○言○紛○更○變○亂○臣○年○踰○七○十○鐘○鳴○
漏○盡○明○主○不○棄○進○之○內○閣○是○臣○書○遭○逢○之○日○也○臣○請○
擇○其○要○綴○爲○奏○章○次○第○上○獻○乞○下○內○閣○二○三○儒○臣○會○
同○斟酌○擬○詔○施○用○或○有○窒○礙○姑○畱○俟○後○臣○決○不○敢○護○

短○求○勝○帝○曰○謨○猷○入○告○大○臣○職○也○卿○究○心○當○世○久○矣○
所○欲○有○言○其○卽○聞○朕○明○年○上○言○臣○所○進○大○學○衍○義○補○
條○目○甚○多○然○皆○一○代○一○時○之○事○若○所○謂○經○籍○圖○書○乃○
萬○年○百○世○之○事○也○臣○本○書○中○有○曰○廣○圖○籍○之○儲○者○臣○
竊○惟○圖○籍○所○載○皆○聖○帝○明○王○賢○人○君○子○精○神○心○術○之○
微○道○德○文○章○之○懿○行○義○事○功○之○大○天○地○山○川○人○物○風○
俗○之○所○載○禮○樂○刑○政○制○度○文○爲○之○所○出○今○賴○知○古○後○
賴○知○今○者○也○是○以○自○古○帝○王○當○務○爲○急○卽○漢○唐○宋○創○
業○之○君○始○有○天○下○莫○不○先○收○圖○籍○迨○厥○中○世○稍○有○散○

闕輒分行天下懸賞購之授官酬之五代亂離猶然
不廢高皇帝至正丙午年首求遺書既平元都得其
館閣秘藏又廣購於民間沒入於罪籍一時儲積不
減前代太宗當多事之時猶聚衆千百纂集永樂太
典以備考究今承平百年中外無事國家尚有餘力
採緝佛道用備藏經遍賜天下寺觀雕以良梓飾以
文綾儲以髹紅函匱載以金碧輪藏況此儒家經籍
如前所云烏可惜日月之力吝纖毫之費使其放佚
廢墮夫自古藏書不一所漢有東觀蘭臺鴻都唐有

秘書監集賢書院。宋有崇文館秘書省。諸處我朝罷前代臺監館省之官。併其任於翰林院。院設典籍三員。掌之天下書籍。盡歸內府。南京國子監雖設典籍。所掌不過累朝頒降若舊鐫書本而已。夫國家經籍圖書之儲。兩京皆有。永樂中遣修撰陳循於南京文淵閣。自一部至百部以上。各取一部於北京。今請敕大學士等。將內閣現成書籍。計委學士以下督同典籍等官。一一彙若干部。部若干卷。木刻比較年月。及委官名銜。識於其後。或有副餘。分送一部於南京國

子監仍敕南京內外守備大臣會同禮部翰林院官
稽閱永樂中數有僅一本無副餘者下國子監再行
抄錄他若內閣所無或不備者錄付禮部分行天下
提學憲臣榜示官吏軍民之家與凡官府學校寺觀
舖坊令送所在有司謄寫校對先後進呈其藏書之
所二在京師一在南京使一書而有數本一本而有
三處復倣宋朝曝書給酒食費之例每歲三伏先期
奏請翰林院量委堂上官一二員偕僚屬同赴曬晾
畢事局鑰內外大小衙門因事有欲稽考必請上旨

以爲常規。臣又惟高皇帝御極三十年。所有制作。多出宸衷。非若前代帝王假手詞臣之比。今頒行天下者。惟皇明祖訓大誥三篇。大誥武臣。資世通訓四書而已。御製詩文。雖業編梓。天下臣民。常稀得見。至其編類在內閣書目者。猶有御註洪範。御註尚書。御註道德經。文華寶鑑。昭鑑錄。外戚事鑑。存心錄。精誠錄。省躬錄。志戒錄。永鑑錄。忠義錄。爲政要錄。彰善癉惡錄。武臣鑑。醒貪簡要錄。務農技藝簡要錄。女戒務本訓。諸書。是皆我聖祖心思之所運形。手澤之所沾漑。

至當時儒臣所纂則又有大明帝紀皇明寶訓大明
寶訓洪武聖政記大明日厯等書今盡藏內閣天下
臣民無由覩記我聖祖功德之隆萬世如見卽不假
言語文字以傳而聖子神孫繼述揄揚故不容已臣
請發行鑄印大頒中外若其間繁不易舉質難行遠
者請如洪武六年翰林學士詹同宋濂等纂集日厯
以爲寶訓之例倣唐人貞觀體製撮綱分類輯成示
書上而朝廷用以資治下而學較用以教人科舉用
以取士並行六經偶盛五帝亦不刊之典也若列聖

相承致治之跡。惟賴實錄寶訓二書。今代經六帝世。盈十紀。巍乎煥然。昭哉可觀。旣無金匱石室之具。又無名山副藏之制。惟內府內閣各儲一部而已。臣不識忌諱。一旦有不測之故。出衆人所不慮。則一代治體要典。文章之盛。末由憑稽。後來秉史筆者。且求之草澤之中。訪之傳聞之外。真贗莫辨。簡牘散亡。非但大功異政。不得紀載。而明君良臣。爲人蒙污。或亦有之矣。臣愚過計。欲乞於文淵閣旁。近別建重樓一所。專累甃石。不用樑棟。敕寫一部。藏以銅匱。皮樓上。層

凡國家大事文書玉牒之類皆附焉。其詔冊制誥勅書行禮儀注。若應制詩文。與夫前朝遺事。或諸雜錄。亦勅先後錄寫。盛以鐵匱。庋樓下層。而凡內府衙門所藏文書。可爲異日纂修之備。及永樂以前文武官貼黃之類。亦皆附焉。則祖宗功德。傳以無疑。國家典章。俟之不惑。書奏帝嘉納之時。太監李廣漸進。左道親近。用事。濬因言。陛下改元歲在戊申。與太祖初元同符。宜體上天仁愛。念祖宗基業。修德以立本。清心以應務。謹好尚。節財賄。公任用。禁私謁。釐革庶政。盡

復國初之舊。因擬二十二事。曰佛道二教。可延福祚。曰修煉金丹。可致長生。曰創建寺觀。可植福田。曰印造經懺。可冀利益。曰修齋設醮。須豐盛。曰誦經持咒。可禳度。曰崇重西僧。求秘術。曰祀神。可福佑。曰宴享品物。須豐侈。曰匪頒賜。如舊例。曰寶石。可服玩。曰欲街市和買應用。取直官府。曰求閒田爲已業。曰差官於外。織造措辦。曰獻珍異器。希賞賜。曰宮室損壞。須改作。曰折糧備顏料。曰工作人勞苦。希陞賞。曰所司使用乏人。當額外增置。曰工巧人授以職。曰技藝。

雜流欲得文武要秩曰無出身人欲於文武官常員銓註皆請有言及而以理折之蓋廣所欲請於上而濬先發者疏幾萬餘言帝雖嘉納未能行也六年當考察天下朝覲官濬請如唐虞三載考績三考黜陟之制蓋亦衍義補所言於是吏部尚書王恕所奏黜者以上旨畱其二十之一濬又時對人言恕行事不合祖宗朝典故以風示之亡何太醫院院判劉文泰訐恕恕意濬教文泰遂求去於是言者譁然攻濬摘濬悼亡長思錄戲劇五倫記爲不經之作帝不問也

濬自少苦學。老而右目失明。在朝半疾病。屢求去。帝特免其朝參。以優之。七年。加少保兼太子太保。改戶部尚書。武英殿大學士。八年。卒於位。計聞帝輟朝。賜賻祭葬。贈特進左柱國太傅。諡文莊。遣行人護歸。官其孫。當尚寶司丞。濬仕四十餘年。自處如韋布。其卒也。家人治裝圖書數萬卷而已。嘗考諸儒論著作家禮儀節。以補朱子家禮所未備。採朱子平生微言要義。倣魯論作朱子學的二十篇。謂朱子綱目一重正統。而秦隋之末。有不可遽奪。漢唐之初。有未可遽子。

者作世史正綱。濬兩與策士及爲國子祭酒諄諄以文體士行訓人。斥險怪之詞。示中庸之道。士始不信。卒翕然服焉。濬論史謂范仲淹生事人也。料岳飛未必能恢復。取秦檜有功。宋家末造黜元不與正統。以許衡無能改於元之俗。卽不仕可爾。其說士人有信。有訾。而所論許衡出於弱冠。嶺南耆宿皆服其言。子敦沉默博記。善文章。早卒。敦子京。蔭授中書舍人。仁愛好施。有其祖風。嘗卒。正德初復以曾孫郊繼其官。賜濬景賢祠於鄉。以配宋學士蘇軾。何喬新論嶺南。

人物自唐張九齡宋余靖崔與之及濬四人而已郊亦有孝弟稱。

何喬新

何喬新字廷秀廣昌人宋何坦之裔父文淵初知溫州府有名後爲吏部尚書乃不稱喬新剛介簡重自爲秀才時不妄交人蔬食布衣蔑如也旣舉進士銜命淮西文淵門人爲巢縣尹者寓金帛壽文淵喬新力却之尹曰以壽尊公非足下也喬新曰附人可爾不宜附子使還授南京禮部主事丁文淵憂歸景帝

之廢沂王而立太子也。文淵擬草詔語，素自喜爲人誦之。及天順改元，文淵政家居，旦夕虞禍，適副都御史陳泰左遷道縣，有傳泰奉命來者，文淵懼，自經死。有所愛妾，霸州人，諸子令之嫁，不官。縣人揭稽者，文淵門人也，爲侍郎，謫官家居，奏文淵死實，其諸子遇之以脫禍。又逼嫁文淵所愛妾，詔逮繫獄，拷掠霸州妾，剝十指爲喬新訟冤，乃釋歸。喬新旣解獄，服闋改刑部陝西司主事，遷廣東司員外郎、郎中，其所以執案錦衣，無所寬貸，名亦由此起。喬新律比精審，郎刑

部七年尚書侍郎皆重之。同曹皆自謂不及。成化初，陞福建按察副使。行部所至，問利害興除之。陞河南按察使。河南大水，艱食，流民入境，發粟爲粥，出庫給布，所全活甚多。兩覲京師，僦車行朝服，圖書而已。陞湖廣右布政使。荆襄大水，巡撫都御史檄喬新賑濟。喬新慰拊如河南治，民懷吏畏。清徹湖湘十七年。陞右副都御史，巡撫山西，兼督三關兵備。山西連歲旱饑，喬新賑救，復如河南治。轉爲左奉敕理獄，未減爲多。其所治爰書疏奏，簡明。憲宗覽而善之，名爲刑部。

右侍郎曰。酋小王子寇大同。殺邊將。畿內震駭。朝議以喬新久習山西。請奉敕往。喬新築城奶河堡。集精銳守衝要。口不來。山西復大饑。帝復命往賑。所活三十萬人。招還復業者十四萬。孝宗元年。陞南京刑部尚書。更名入爲尚書。與王恕、彭韶、馬文升、張悅並繫時望。其明年。京城雨水爲災。下詔求言。喬新言。臣備官司寇。請以律對。臣讀大明律一書。高皇所親定。事例諸條。列聖所推廣。情理輕重。可謂至備。然厥文深奧。官吏講解未明。往往害辭害意。漢書曰。衷者中也。

不輕不重之謂也。請敕都察院大理寺會議講明律意。務求厥中。奏上。時當事者劉吉素不爲喬新所重。悉格不行。郎魏紳者。喬新曹屬。喬新最重之。會大理丞缺。御史鄒魯覬得喬新力薦。紳魯大恨。誣奏喬新外家與鄉人訟。喬新得其金錢爲行賄。吉取中旨下。諸根連人錦衣獄。或勸喬新愬。喬新曰。愬已則自文。愬人則涉訐。吾有解印去爾頃之錦衣窮治無驗。予致仕。廷臣先後奏請起用。並求申雪。悉寢不行。其後魯爲仇家。瞿兩目。犯罪論戍。士論快焉。喬新博學嗜

古聞異書輒從人假錄。卷軸至三萬餘。多自較讐。箋註與邱濬以文學相善。而氣節友之。彭韶蔡清慕其人。自納爲子弟。年七十餘病卒。巡撫都御史林俊言。喬新敷歷中外。終始全德。致仕十有餘年。足跡不入城府。聲色貨利。素不嬰心。著書立言。老尤造妙。可與故刑部尚書彭韶並諡爲文吏。部覆奏有旨。令具喬新致仕緣故。以上吏科給事中吳世忠言。喬新學行政事。莫不優長。忠勤剛介。老而彌堅。被御史鄒魯私怨。誣以小事。一辭不辨。歛然退歸杜門。著書人事寡。

接喬新平生之名克滿士大夫之耳。鄒魯擯死人謂
殃慶之公。陛下若必考退身之由。疑獎賢之典。則如
宋○蔣○之○奇○嘗○誣○奏○歐○陽○修○矣○胡○竑○輩○嘗○誣○奏○朱○熹○矣○
然○當○時○人○主○不○以○一○人○私○情○沒○萬○世○公○是○並○贈○太○師○
並○謚○曰○文○夫○如○此○者○亦○陛○下○今○日○勸○懲○大○權○也○亦○竟○
寢○正○德○十○一○年○廣○昌○知○縣○張○濬○復○以○爲○言○乃○贈○太○子○
太○傅○廕○一○子○入○監○十○二○年○賜○謚○文○肅○

楊守陳

楊守陳字惟新鄞人先世以貲聞而祖範爲儒者父

自愆縣吏也。有陰德。守陳景泰元年。舉浙江鄉試第一。明年第進士。改庶吉士。時景泰帝宮中嘗以金銀爲豆。剪銀壺如花葉。亂撒地下。令宮人宦侍爭拾爲圓。笑守陳賦銀豆謠京師傳之。尋丁父憂。及承重喪。七年。學益邃。遠讀三禮孝經學庸語孟易書春秋章句。多有更定。天順二年。授翰林編修。尋被命教習內侍。辭不許。憲宗朝。累官司經局洗馬。克經筵講官。嘗講武成篇末。因進言曰。昔魯論稱舜無爲周公稱武王垂拱。然而天下皆治。後世人主有深嚴中禁。委政

內侍者乃禍召望。高居無爲肆情嬖艷者。乃變啓
祿山。則憂勞之心先殊。而安危利菑之樂自斃也。此
聖狂治亂所以判。惟陛下慎之。聽者以爲戇。久之陞
侍講學士。尋丁母喪。服除。還任。守陳素羸疾。靜默自
守。鶴立蒼髯。若山澤之臞。一官五品十六年矣。泊然
自處。而舊時所教內侍多貴。幸有欲爲夤緣者。守陳
曰。豈婺半生老。乃嫁夫。一時薦紳誦爲名語。孝宗爲
太子時。出閣講學。守陳被選。爲日講。預修文華大訓。
書成。陞少詹事。兼侍講學士。先時翰林修文華大訓。

有事涉中貴人者。率削去。至守陳獨不肖。在廷大臣。數薦守陳可大用。及孝宗卽位。論進宮僚官。奏擬南京吏部右侍郎。帝手塗南京二字。畱之。時王恕爲吏部尚書。劉紹和與守陳爲左右侍郎。三人協心相與。凡人材忠邪。易險守陳侃侃言之。恕率聽用。守陳復以大經筵禮法峻整。早朝侍衛森嚴。上難盡羣下之情。習國家之務。疏請經筵之外。更開小經筵以講學。早朝之外。更御午朝以聽政。小經筵則擇端介博雅之儒。侍班進講。偶或未明。輒賜清問。陛下退朝。又當

常御文華後殿。或前殿。以養心窮理裁決庶政。凡經史諸書。以及祖宗典訓。百官奏覆。皆當聚之殿後。日輪內閣大臣一員。講官二員。使居前殿右廂。陛下若有疑難。或錄示之。或召使對。午朝則陛下御文華門。五府六部都察院堂上官。並六科各輪番列侍。其御史郎中等官有事已具本者。陛下詢其事情。條例而裁決之。鎮巡方面及府衛正官。有自任所來見者。皆使條列地方之事。陛下令諸司承旨議行。若有大政。則御文華殿。召內閣與在廷大臣會議。使人盡謀斷。

其有未當許諫官駁覆陛下更審行之其餘具本進者皆與內閣大臣面議批荅凡大小官員奏事之餘見辭之際陛下必俯降辭色詢問政事庶賢才常集於目前視聽不偏於左右帝嘉納之會修憲宗實錄克副總裁仍兼理部事守陳請解部務專意史職不允頃之疏乞致仕不許命以吏部侍郎兼詹事府丞史館供職如故亡何卒爲宏治二年計聞帝嗟悼賜謚文懿後二年實錄成贈禮部尚書守陳孝友天至處朋友篤於信義平居和易若可親狎至所執持莫

得○撓○奪○與○何○喬○新○相○善○。喬○新○嘗○治○大○獄○。悟○權○貴○。幾○中○
奇○禍○。衆○謂○喬○新○固○守○陳○獨○壯○之○守○陳○之○學○。自○六○經○子○
史○。旁○及○九○流○。莫○不○探○綜○。卒○歸○諸○道○。其○較○定○羣○經○。謂○書○
象○以○典○刑○一○章○。乃○舜○命○官○之○辭○。詩○卷○耳○。乃○大○夫○行○役○
之○作○。孔○子○曰○。吾○於○柏○舟○。見○匹○夫○之○不○可○易○也○。是○亦○非○
作○於○婦○人○者○。又○謂○春○秋○主○事○。當○無○不○載○。詩○主○詞○。當○有○
所○擇○。若○鄭○衛○諸○詩○。果○爲○淫○者○。自○作○。孔○子○必○不○錄○之○。禮○
喪○大○記○一○篇○。則○儀○禮○經○文○。其○抱○遺○經○。以○求○聖○人○於○言○
表○。如○此○。弟○守○陞○南○京○吏○部○尚○書○。爲○文○師○。昌○黎○學○師○伊○

學統

卷之四十二上

聖

之。川蒞官精勤。嘗與守陳對署南北翰林院事。時人

學統卷之四十二上終

學統卷之四十二下

孝昌熊賜履敬修甫編

附統

蔡清

蔡清字介夫晉江人成化十三年舉福建鄉試第一
二十年成進士清自幼好學淡於仕進病告久之嘗
講學水陸僧寺江南之士多從之遊宏治初元以母
憂赴選得禮部主事吏部尚書王恕稔其學行奏改
爲吏部稽勲主事時與譚論諮訪清因上管見二劄

於怨言。今朝廷之患。在紀綱廢弛。以至士風日弊。民
力日絀。當大有以振作之。乃可銷境內之憂。靜疆場
之警。又薦引名士。劉大夏等三十餘人。恕皆納用。庶
吉士鄒智論事下獄。罪且不測。刑部尚書何喬新方
在告。清諸喬新強之出。喬新卽疏救智。得謫官嶺南。
居久之。丁內艱。服除。吏部有不悅者。以補禮部祠祭
司員外郎。乞便養。陞南京吏部文選郎中。一日心動。
乞終養。至家兩月。而其父歿。人謂孝感所致。正德改
元。卽家起。江西提學副使。時宸濠方圖不軌。凡朔望。

藩臬官皆先朝宸濠次日乃謁孔子廟清至力請僚屬同日行禮先謁廟後朝王宸濠生日令藩臬官著朝服賀清曰臣子見君則朝服無見王者去轂而入宸濠大怒一日宴藩臬官宸濠嘲清曰公乃不能作詩清對某平生於人無私蓋私與詩音相近宸濠益銜之其後奏求護衛已得請矣清怏怏有後言宸濠聞之欲誣以非議詔旨之罪清正色對遂疏乞致仕宸濠猶陽善挽留之且欲以女妻其子清力辭歸時劉瑾方專權駕引名士以掩人心不數月復起爲南

京國子監祭酒朝命未至而清已卒。清素羸弱而色清。氣和外簡。內辨。與論天下古今。一以禮義折斷。其言剴切而精深。其淵軌貞風。使人妄消躁息。其學初主於靜。後主於虛。因以虛名齎嘗爲密箴。不以示人。積久至五十條。皆自砭自箴之辭。兢兢然惟恐慚負。天地君親得罪師友。其言曰。學宜養正。性持正行。虛心涵泳。切已體察。八字要訣也。又曰。宋儒之道。至朱子始集大成。朱子之學。不明則聖賢之道不著。故與其徒著四書蒙引。易蒙引。諸書皆推原朱子之意。常

帷燈臥榻傍。或夜分與諸生講論。寢後有得。亟記疾。
書友善甯永貞。林俊孫。交楊廉丁璣。江朝東。而師事。
何喬新。其言易則師三山林北。傳其易者則同邑陳。
琛。至今言易者皆推晉江成宏。間士大夫理學中輟。
永貞廉璣朝東與清皆崛起稀曠之後。而清與廉尤。
爲獨得云。萬厯中僉都御史詹仰庇請易名於朝。賜。
諡曰文莊。大學士李廷機復爲請贈。贈禮部侍郎。

黃輦

黃輦字伯固。莆田人。以進士起家。累官兵部武選郎。

中時武宗有南巡之命。諸大臣莫敢言者。輦上疏曰。陛下臨御以來。祖宗紀綱法度。一壞於逆瑾。再壞於倭倖。又再壞於邊將之手。至是蕩然已。天下知有權臣。不知有陛下。陛下弗知也。恐後知之晚已。先儒周惇頤曰。聖人定之以中正仁義。主靜立人極焉。又曰。吉凶悔吝。生乎動者也。吉一而已。動可不慎乎。故聖人主靜。君子慎動。陛下盤游無度。流連忘反。過動矣。古之明王。用人之言。而顯其身。後世不用其言。又加罪焉。今也又不然。臣僚有言。時政者。左右權臣。往往

匿不聞言。權臣則畱中不出。而以他事中之。使其不以言獲罪。而以他事獲罪。臣故恐陛下知之晚也。孔子曰。名不正。則言不順。言不順。則事不成。陛下無故自稱威武大將軍。鎮國公。自輕如此。則誰爲陛下者。天下不以陛下事陛下。而以將軍公事陛下。天下皆將軍公之臣矣。古天子有號。爲獨夫。有欲爲匹夫而不得者。臣切爲陛下懼也。近者復有南巡之命。南方之民。流離奔跽。爭先挈妻子避去。卽今江淮饑父子兄弟相食。天時人事如此。重以蹙之。幾何不爲盜賊。

速○之○死○亡○也○奸○雄○窺○伺○待○時○而○發○變○生○在○內○則○欲○歸○
無○路○變○生○在○外○則○望○救○無○及○陛○下○斯○時○悔○之○後○矣○居○
位○大○臣○用○事○中○官○親○暱○羣○小○豈○有○一○毫○愛○陛○下○之○心○
哉○皆○欲○陛○下○遠○去○而○後○得○擅○權○自○恣○乘○機○爲○利○也○其○
不○然○則○袖○手○秦○越○不○涉○休○戚○者○也○陛○下○宜○翻○然○悔○悟○
下○哀○痛○之○詔○罷○南○巡○撤○宣○府○行○宮○發○內○帑○以○賑○江○淮○
之○饑○散○邊○軍○以○歸○卒○伍○斥○不○御○之○女○使○還○其○家○夫○自○
古○未○有○小○人○用○事○不○亡○國○喪○身○者○也○江○彬○行○伍○庸○流○
兇○狠○傲○誕○陛○下○賜○姓○封○伯○托○以○心○腹○付○以○總○督○京○營○

使其外挾內擁此騎虎之勢亂之道也天下切齒唾罵皆欲食彬之肉陛下何惜不以謝天下哉陛下春秋漸高前星未耀祖宗社稷之託懸懸乎無所寄方且遠事觀遊屢犯不測收置義子布滿左右獨不豫建親賢毗承大業臣謂陛下倒置也伏望豫選宗室親賢養於宮中待他日誕生皇子之後俾就外藩此宗社無疆之休四海之望也帝怒甚下鎮撫司嚴治三加訊杖坐繫一月除名爲民歸杜門著述貸米畱客日中未變晏如也嘉靖改元起大理寺丞尋病卒

行人張岳言。鞏趨向至高學術。甚正有定心。養性之功。故氣節剛勁而不激。有格物窮理之學。故論議持正而不詭。加以清修之苦。才具之優。使天假之年。效忠未量。不幸數奇。身亡中外。相弔伏望博采公論。量予卹典。士氣民風。必有所補。詔贈鞏大理少卿。鞏體質修羸。沉敏好學。疾病支離。手不釋卷。林俊比之美玉。精金云。

陳琛

陳琛字思獻。資稟朗邁。於世無所倚涉。閉門獨學。不

苟同衆舉。正德十二年進士。授刑部主事。乞南戶部。權淮安舟稅。正額旣足之後。大開關門。恣商人來往。惟與賓客譚學賦詩而已。部尚書責其弛慢。琛曰。若克類之盡。鈔關之設。不比禦人之道乎。以便養轉南京吏部考功郎。請告家居。嘉靖中。卽家起貴州按察僉事。調江西提學僉事。並辭不赴。琛高潔散朗。其學得意在文辭之外。酒盃詩興。常自放山硯水涯間。有喟然與點之意。所著四書淺說。易經通典。亦皆推明朱氏之說。學者宗之。張襄惠公稱其人曰。有避世之

學統卷之四十二
深心而非玩世無道學之門戶而有實學世論以爲
平當

邵寶

邵寶字國賢無錫人成化二十年進士初知許州以
禮教爲治作新廟學正頴考叔祠封晁錯之墓改魏
曹操廟以祀漢獻其稱漢獻也不曰獻而曰愍以從
昭烈之所封祀裴度於鄆祀范純仁於襄城巫挾龍
骨倡妖杖巫取龍骨毀之躬農種行社倉民用克足
文風蔚然宏治七年陞戶部員外郎尚書周經劉大

夏甚器重之。進郎中。通明條例。平允出納。有所區條。多見諒采。陞山西提學副使。正德初。累陞左副都御史。總督漕運。劉瑾用事。坐平江伯事有連。欲禍陷之。李東陽力救。得致仕。瑾誅。起巡撫貴州。未任。尋陞戶部侍郎。疏乞養母。十四年起南京禮部尚書。以終養。辭。嘉靖初。大臣言官交薦。再起。再辭。特與終養。母喪服闋。請致仕。不允。卒。寶少孤。力學。弱冠著名。服官內外。雖公務叢委。條貫整飭。爲人樂易。謙虛。不見喜怒。人悅而歸。如川赴海。嘗謂願爲真士夫。不願爲假道。

學當世以爲名言。所著有容春堂集。該括羣寫極所。欲言而無冗長辛苦之色。李東陽稱之曰。國賢所作。蓋欲進於古人。以幾於口無擇言。言必有中者也。寶視學江西。山興水舫。紬繹經史。欣然有會。日記月載。復名曰格子。以附格物之義。其經書所得載諸簡端。名簡端錄。巡撫吳廷舉以上之朝。其卒也。贈太子少保。謚文莊。

楊廉

楊廉字方震。豐城人。父崇。永州知府。受業於胡九韶。

爲吳與弼高弟。廉漸濡其學。蔚爲儒者。成化中舉鄉試第一。二十三年試禮部第三。選庶吉士。移疾家居。宏治三年授南京戶科給事中。益畱心世務。凡民隱吏治。兵政賦役。以至星厯等學。莫不究論。會管後湖黃冊灤州知州某請抄冊以便清軍。行戶部許之。廉駁言其不可。人以爲識體。以憂去。服闋補刑科給事中。因地震劾奏大臣。首薦張元禎。吳寬。李東陽。王鏊。劉戡。宜備日講。復請優禮吏部尚書王恕。敘復楊茂元。盛應期。之因事獲譴者。薦引知名士劉大夏。謝鐸。

林俊曹璘等可備任使。屢上時政邊務多見采行。未幾求便養。改南京兵科給事中。十三年陞南京光祿寺少卿。書張天謨監司竹監舉家不食笋十二字於屏。入賀千秋節。上言輔導皇太子須留意學庸語孟之書。慎選宮僚。日與遊處。庶可得傅德保身之助。正德初陞南京太僕寺少卿。環滁諸生執經門下。爲剖判同異。開引指歸。謹尚廉耻。敦崇風化。莫不感服。復以憂歸。服闋補南京通政使。七年陞順天府尹。在事弊病罷行。倖私屏息。皆前尹所未爲者。十年陞南京

禮部侍郎聞車駕將南巡上言極諫嘉靖初元陞南京禮部尚書取大學衍義撮其切要進之經筵大禮之議不行八疏乞休許之給驛廩輿夫歸居二年卒贈太子少保賜諡文恪廉畱心伊洛之學居敬窮理老而不懈才智幹局綜世達務其文章言議推理明法足以決疑定是爲人清約嚴重就之則言溫氣和愛人好士出於誠意著述甚富而所輯國朝文臣及理學諸臣言行錄尤行於世

魯鐸

魯鐸字振之景陵人宏治十年舉進士第一改庶吉
士授編修謝絕交游沉潛學問以清節著聞正德初
爲國子司業李東陽生日其僚長趙永約鐸往壽鐸
曰公何將曰兩方帕鐸曰當如君入索帕無有躊躇
久之日記有枯魚卽取魚往家人曰已食其半矣鐸
攜半魚與永俱東陽欣然沽酒烹魚與飲三人大歡
罷以父老乞歸養尋丁艱邑有犬而角衆共質鐸鐸
曰兵象也亡何劇賊大起嘯聚劫掠顧相戒無犯魯
公家鄉里人依之存活甚衆五年起復職復得告復

被命起歷南北祭酒鐸蒞官虛心約已端飭自勵情
愼教士重力行抑競進而憂時濟世尤爲惓切又復
請告嘉靖初元起復舊官復以疾辭許之刑部尚書
林俊言鐸清約渾晦志尚真純道足鎮雅黜浮學足
訂頑起懦請如孝宗用謝鐸故事卽家敦促一時撫
按臺省先後論薦五推卿佐皆不應命作園曰已有
是之造臺闢洞俯仰礙巾幘客非稔交深誼不得而
造也而與童子俱讀書哦詩以自娛年六十七卒詔
諡祭賜諡文恪故事四品文臣無諡鐸以清節得之

卷之四十二
鐸辭華耽寂養正明恬雖功不及康濟而休風令節
激昂貪鄙位不及卿相而榮名重望歆仰物情

王廷相

王廷相字子衡儀封人丰姿奇秀讀書日記千言十
二歲爲邑庠生文有英氣詩賦雅暢宏治十五年成
進士選翰林庶吉士與李夢陽何景明崔銑號爲四
傑授兵科給事中條論時政不避危忌父疾疏歸旣
歿哀痛踰禮正德中起服謫判亳州陞高淳知縣選
御史巡鹽山東裁勢豪私販諸弊巡按陝西憲度益

振鎮守太監廖巒煽虐關中。廷相隨事禁革。巒殊奮憾。提學京畿中官王劉納賄屬事。廷相焚其書。適鑿誣。廷相王劉合力構之下。詔獄。謫贛榆丞。陞孟國知縣。松江府同知。僉事四川副使。山東皆提督學政。敦士節振萎習。諸生翕然化之。嘉靖初。陞湖廣按察使。李見招亡納叛。拒殺軍人。捕獲絕其患。陞山東右布政使。丁內艱。服闋。陞副都御史。巡撫四川。沙保向汎倡亂。日久。廷相舉何卿故事以勵諸將。遂勦平之。宥降散衆。口境以安。進兵部右侍郎。尋轉左。陞南京兵

部尚書改左都御史兼兵部尚書領十二團營以臺
政分條類奏帝允行之六年考滿加太子少保扈蹕
幸承天加太子太保賜玉帶廐馬亡何郭勛坐罪下
獄帝詰其領營敕事因責廷相黨附不行白奏革職
爲民給事中劉繪疏救不允廷相厯事三朝以忠誠
不欺爲先遇事之當爲毅然必行自謂大舜鷄鳴而
起周公坐以待旦不予過也博古通經究諸實用禮
樂律厯象緯醫卜靡不穿通所著有禮樂雜論四十
篇夏小正解十三篇荅天問一篇雅述慎言十五篇

自言知道以來。仰觀俯察二十餘年。言積數萬。其於仲尼之道。衛守之嚴。不敢異端。雜之蓋竊附孔氏之徒云。

張邦奇

張邦奇字常甫。鄞人。生而疴瘠。苦學。耽經籍。年十七。舉鄉試。登宏治十八年進士。改庶吉士。授翰林院檢討。非人不交。非物不取。時然後言。擇地而蹈。時謂大雅君子也。武宗朝著。張騫乘槎賦見志。蓋以西域喻劉瑾。以騫喻一時附瑾者。已乞告歸。省食貧而已。而

孝○事○父○母○舉○足○發○言○率○規○視○容○色○爲○進○退○讀○書○之○暇○
時○時○從○田○駿○佃○作○當○道○勸○駕○勉○至○京○師○力○求○便○養○出○
爲○湖○廣○提○學○副○使○出○教○示○諸○生○曰○學○不○孔○顏○行○不○曾○
閔○雖○文○如○雄○褒○無○益○也○與○諸○生○譚○學○根○極○理○要○必○人○
人○悟○暢○乃○罷○邦○奇○奉○親○遊○宦○旣○二○親○不○樂○久○居○楚○復○
乞○歸○世○宗○卽○位○用○薦○起○提○學○四○川○復○以○去○親○遠○乞○休○
撫○按○奏○移○近○地○改○福○建○厯○陞○南○京○吏○部○侍○郎○丁○外○艱○
起○吏○部○侍○郎○久○之○以○原○職○兼○學○士○掌○翰○林○院○事○後○以○
母○老○累○疏○終○養○帝○曰○壽○母○大○臣○古○治○朝○乃○有○不○許○尋○

以原職掌詹事府事。九載進禮部尚書。掌詹事府如故。終以母老。數乞歸。特改南京吏部尚書。已改南京。兵部以便之。帝時時欲用邦奇。而邦奇卒。贈太子太保。謚文定。邦奇之學。以人性無不善。以聖賢必可師。澄神一志。以繹沐浴濂洛之旨。嘗曰。知書之爲我也。則書卽學矣。如以書而爲學也。則學非書矣。又曰。譬之權焉。權勝物。則物輕。物勝權。則權輕。故在我者。苟重。則靡麗崇高。靡不輕矣。在我者。苟輕。則小物末技。靡不重矣。爲人仁孝切至。臨政持大體。不苟議論。依。

忠○孝○每○言○事○未○嘗○不○稱○引○天○下○長○者○功○名○之○際○恒○自○
退○抑○不○與○時○競○惟○時○時○發○憤○曰○賴○天○之○靈○耄○齒○有○聞○
顛○毛○種○種○未○有○所○底○人○亦○有○言○行○邁○屢○稅○胡○然○有○迄○
是○誰○之○咎○與○是○誰○之○咎○與○人○稱○靖○恭○正○直○含○宏○寬○厚○
博○達○通○明○清○儉○莊○肅○邦○奇○兼○而○有○焉○

熊浹

熊浹字悅之南昌人博學精易正德九年進士授禮
科給事中宸濠之將反也錮御史熊蘭及浹至親爲
質浹與蘭以宸濠反狀密授御史蕭淮奏聞世宗卽

位奉使四川松藩副總兵張傑故倚江彬內援大肆
殘墨所箠死千戶以下五百餘人誘殺熟獒上功率
家丁遮擊兵備胡澧浹疏傑坐視職邊人快之大禮
議起浹持論與張璉合吏部惡浹出補河南參議而
世宗識之召修明倫大典居一年擢右僉都御史厯
轉左都御史掌院事浹雖以議禮受知顧未嘗附上
意旨嘉靖八年京師民張福者自殺母誣告里人杜
東厰以聞下刑部坐杜不服福有姊與福隣人皆證
福自殺母刑部請覆審以命郎中魏應召改坐福東

厥執奏。帝怒。命三法司及錦衣鎮撫逮問。應召覆按。福柱事決。如應召所改。坐再上之。帝意決。狗庇磔。決。職下。應召等考訊。侍郎許讚以下。皆惶恐謝罪。給事。陸榮。劉希簡。以爲言。帝復怒。榮等不待問報。先事妄。瀆。俱下錦衣考訊。其後讚等竟抵死。柱如原擬。應召。及隣證俱發。邊克軍杖福姊百。以決嘗贊議大禮。姑。更革職。閑住。十八年。車駕謁山陵。帝與近直追論舊。臣。諭吏部起用。決尋陞南京禮部尚書。明年改南京。兵部尚書。二十三年。召入爲兵部尚書。兼右都御史。

復掌院事。踰年爲吏部尚書。以母年九十求去。帝固
留之。賜粟帛存問。帝營箕僊臺。浹極言僊妄。先是楊
爵周怡坐諫僊祥禱祠繫獄者久之。箕言爵怡於帝。
帝釋之。至是見浹言大怒。立返爵怡繫獄如故。批浹
疏示大學士嚴嵩。嵩爲婉解。乃罷。蓋爵怡出獄方三
日。爾然帝尚念浹。加浹官太子太保。居兩月。坐推舉
事一再奪浹俸。浹內不自安。會加陶仲文伯爵。子恩
陰復疏爭。留中。遂稱病求退。帝怒奪職爲民錦衣官
較。押回原籍。當差尋卒。浹篤好程朱厭術數之學。居

官恒以不保晚節爲慮。在田十年足跡不入城府。聞朝政失體。四方災變。輒憂形心。穆宗登極。復舊官。賜諡恭肅。

何瑋

何瑋字粹夫。懷慶人。未冠博通經史。至忘盥櫛。旣爲諸生。卽有志聖賢之學。曰許文正薛文清二先生。世未遠而居甚近。忘所師法。學其謂何。宏治十四年發解河南。明年第進士。選翰林庶吉士。改編修。不納泛交。不入要門。朝參無爽。齋祀盡慎。縉紳重之。當劉瑾

時諸翰林相約見瑾長揖而已。旣入，前有跪者。瑋在後，奮聲曰：「何背約也？」出乞休歸。瑾誅起爲修撰。瑋真率恬淡，勵志躬行，外無僕從，內無媵妾。所居垣舍塵溷常積，雖朝衣朝冠，不上鮮明。嘗進講經筵，畏愼過當，宣讀蹇澀。武宗尤惡其衣冠，講罷大怒，傳諭庭撻之。得楊廷和曲救，調開州同知。已陞東昌府同知。兩疏乞歸隱居南村。四方從學甚衆。世宗嗣位，起山西提學副使。尋改浙江按試。至紹興，從舟中望見夏屋渠，渠者問左右曰：「其人治何？」賈起此宅曰：「宦宅也。」瑋

大驚異曰。宦則安能然。左右皆竊笑。陞南京太常寺少卿。歷南京工部右侍郎。改戶禮工三部侍郎。乞致仕。帝已許之。御史毛鳳韶疏薦瑯敦樸。正大允宜。邦禮改命在京調理。然終不爲帝所喜。謂其介而不通。及再乞休致。遂陞南京右都御史。然亦尋許致仕。家居。與關中呂柟。靈寶許讚。儀封王廷相。諸人簡札往來。究辨經書性命之旨。行已救人。切近精實。呂柟以比之聖門。由賜爲文浩瀚。暢達醫卜術數。亦皆通究。素有足疾。旣遭母喪。袒跣益傷。至廢坐立。竟以不起。

隆慶初、贈禮部尚書諡文定。

崔銑

崔銑字子鍾一字仲鳧、安陽人。父陞四川參政、歷官廉慎。銑宏治中舉於鄉、再試不利、就業太學。與三原馬聖高陵呂柟、榆次寇天敘輩同志相勉。十八年舉進士、改翰林庶吉士。正德初、授編修。遇劉瑾、史館長揖而已。他日諸史官旅見銑、與何塘長揖如前。瑾謂張綏曰、翰林輕薄。崔銑尤甚。會修孝宗實錄、成、瑾僞傳旨降俸別調。銑改南京吏部驗封司主事。瑾誅、召

還史館。上書李東陽勸其及時悟主。救民薦賢理財。強兵毋以文章自好。尋告病去。作喻問二篇以見志。嘉靖初。召擢南京國子祭酒。開誠善誘。明教條。正文體。日衣冠坐。諸生問難。大禮議起。疏言皇上求備禮於本生至孝也。然當詳稽禮經。大順人情。今獨任己意。曷有極已。疏入。罷歸。臨行。不役官夫。囊無江南錢物。攜古書數篋而已。公卿及諸生送者千餘人。退處相臺十年。四方來學者。教以研經飭行。曰。道在五倫。學在治心。功在慎獨。學者稱曰後渠先生。世宗立。太

子慎選官僚起詹事府少詹事兼翰林院侍讀學士。尋進南京禮部右侍郎署戶部篆進賀萬壽聖節時有風蠶之變上疏自劾溫旨慰留過家卒計聞遣官治葬諭祭贈禮部尚書諡文敏。

魏校

魏校字子才崑山人始祖潭篤志嗜學元時被薦不起潭生怨事母純孝校爲諸生時每朔望春秋入謁孔子廟肅容瞻拜如親承之弱冠舉於鄉宏治十八年連捷進士費宏一見以范仲淹期之正德初授南

京刑部主事。累遷員外郎。郎中。自以少年筮仕。人情
物理。或未曉暢。每訊重獄。虛已求教於前輩長者。或
反復思維。寢食俱廢。有愬不平者。雖甚喧聒。必盡其
辭。直提牢省視囚人。疾病飲食。悉爲劑調。暑月薰滌
臭穢。至會審監刑。衆皆盛服。事畢宴飲。校獨澹服素
食。慘見顏面。至其履法操正直已行。志亡如也。九年
召爲兵部職方郎中。稱疾家居。究心問學。言今之學
聖人者。不求之人生而靜之初。而求之孩提知識之
始。不察性之欲與物之欲。所以分而但主其流轉之

念○念○聽○其○言○且○聖○人○考○其○行○實○凡○夫○當○將○一○切○名○利○
之○心○斬○絕○淨○盡○立○志○如○天○之○崇○循○序○用○力○跬○步○皆○在○
實○地○乃○可○至○於○聖○人○之○道○家○居○慕○古○簡○重○不○以○事○物○
經○心○塵○凝○滿○室○處○之○泊○然○羸○病○杜○門○聞○一○善○士○亟○疾○
求○見○爲○人○貌○恭○色○溫○而○出○處○取○舍○審○之○至○精○執○之○至○
確○世○宗○卽○位○首○起○廣○東○副○使○提○督○學○政○先○德○行○興○小○
學○以○校○士○聘○翟○宗○魯○以○爲○士○師○禁○火○葬○斥○淫○祠○取○曹○
溪○故○傳○衣○鉢○毀○而○焚○之○居○一○年○丁○外○艱○歸○以○簡○緇○科○
嚴○請○謁○道○絕○粵○人○不○無○舐○望○歸○而○粵○人○有○爲○言○官○者○

學紀
劾校媒孽訓士之短竄之戎籍然校德譽素孚莫能
抑也服闋吏部奏補江西兵備副使力辭旣言官劾
校者坐黜職改命督學河南祠伏羲於畫卦臺以蔡
仲始封國依太公祭爽鳩之義而以世子死社稷書
於春秋者配立經祠以祀子貢曹卹漆雕開秦冉援
漢梅福疏請封孔子後爲世博士守微子廟因歲時
省湯陵不果用居數月用桂萼薦轉大理寺少卿明
年轉國子監祭酒時張璁爲相卿佐入謁多踧踖隅
坐特校爲上客旣酬對亦心服之萼仍薦校爲經筵

講官以進講敬明乃罰章不合上旨改用遂改太常寺添註少卿已陞本寺卿總督四彝館明年致仕歸校事父母至孝居喪動遵古禮友于兄弟與士大夫竿牘往來皆刻責修治之語其篤志聖賢真猶饑渴之於飲食也李夢陽過校論學校勸以沉潛深造夢陽因問平生病痛所在曰公才甚高但虛志與憍氣害道之甚者也夢陽嘆曰吾早見公二十年有此哉校僅一子一孫晚而連喪其荅人慰唁之書言達以破愛敬以易哀畏天以終身焉卒也賜諡曰恭簡

呂柟

呂柟字仲木、高陵人、少志聖賢之學、危坐莊誦、祈寒
酷暑、不越戶樞、居母喪、哀毀骨立、弱冠爲提學楊一
清王雲鳳所知、旣舉鄉貢、就業太學、與崔銑相友善、
邑人高朝用爲戶部郎時、過檢討王九思曰、吾邑有
顏子、子知之乎、孝宗賓天、諸生哭臨、具禮爾柟獨大
哭、出涕羣衆指目爲迂、正德三年、舉會試、廷對第一、
知者皆愕然、歡喜曰、此真狀元矣、劉瑾以鄉人致賀、
柟峻却之、柟疏請帝入宮御經筵、親政事、瑾惡其言、

因風不通問欲中以禍遂引疾歸瑾使校尉尾之至真定無所得返枏在翰林與何瑋最善至是相繼去瑾誅薦起舊職上疏勸學以元順帝爲譬或謂傷直枏曰昔賈山借秦爲喻況主上資度遠高漢文乾清宮災應諂言六事其一曰逐日臨朝聽政其二曰還處宮寢預圖儲貳其三曰郊社禘嘗欽承祇肅其四曰日朝兩宮承顏順志其五曰遣去義子番僧邊軍其六曰取回天下鎮守內臣又累疏勸帝舉直錯枉不報復引疾歸歸值父病晝夜視湯藥步履不敢聲

既○一○年○鬚○鬢○盡○斑○父○卒○痛○哭○嘔○血○葬○時○雨○甚○徒○跣○搗○
踊○蹈○踴○泥○潭○中○道○路○環○觀○有○泣○下○者○葬○已○廬○中○門○外○
朝○夕○哭○其○居○喪○時○自○成○服○奠○葬○以○至○祥○禫○斟○酌○損○益○
各○有○儀○注○柩○自○少○窘○匱○及○貴○前○後○居○家○十○年○讀○書○守○
道○一○無○所○營○服○闋○當○道○交○薦○值○世○宗○卽○位○起○入○史○館○
纂○修○武○宗○實○錄○帝○御○經○筵○柩○當○進○講○適○仁○祖○淳○皇○后○
忌○辰○口○奏○宜○存○轡○服○之○禮○罷○酒○饌○之○賜○朝○論○躋○之○復○
疏○請○尋○溫○聖○學○以○爲○新○政○之○助○必○克○已○慎○獨○上○對○天○
心○親○賢○遠○讒○下○通○衆○志○大○禮○議○起○意○見○與○時○不○合○亡○

何奉詔修省。復以十三事上言。自劾。皆格。心責難之。
論帝曰。此大臣宰相職。呂柟忤慢。乃引爲已。咎下獄。
考訊。尋謫解州判官。會解守卒攝州事。率其士民躬
行禮讓之。化州中道不拾遺。行不相忤。久之以薦轉
南京吏部考功郎中。頗行士民接踵跪送。哭聲震野。
旣渡河。干猶聞不絕。相與立祠生祀之。尋擢南京尚
寶卿。吳楚東南士來受業者。冠履錯沓。旣考績。擢南
京太常寺少卿。居頃之。太廟災。上疏乞罷。不許。陞國
子祭酒。躬行率下。間取禮儀及爲詩樂圖譜。令諸生

講肄疾者問而醫之。喪者弔。賻之死者哭而歸其柩。才者揭於教榜。撥厯獎之。一切請託。斬絕不行。人稱自宋陳吳章四祭酒。以師道自立者。呂先生也。御史張景薦枬德行文章。可謂一代碩儒。當今師表。擢南京禮部右侍郎。帝欲視山林於承天。枬屢疏勸止。不報。旣以表賀聖節赴京。值奉天殿災。上疏乞休。允之。枬立身與人。仁信自將。爲禮部侍郎時。霍韜爲尚書。故與夏言相惡。嘗榜言過於衢。枬諷韜曰。此告於天子者。公以語路人可乎。言談韜短。枬曰。公位宰相。容

天下之賢何所不可。夏霍雖不相能，賴柎稍解。然夏疑柎黨霍，霍亦疑柎黨夏。柎終不自較，嘗過府太守。太守子讀書樓上，太守令止之，曰：「恐傷氣，當微誦。」既戒左右，時進食，扶掖之。上下柎謂太守曰：「公愛子至矣，願推此心以安百姓。」又過一府太守，餞之郊，餞席近養濟院。柎送饌院中，曰：「以公佳肴，其之無告。」柎凝厚方面，潤輔微髭，輪耳海口，兩目有光。平居端嚴，恪毅門人從之數十年者，未嘗見其倫語情容。所在四方士就而問學，柎教之以誠，寔近母遠，寔粗毋精，自

日用情變。倫教物理。推而遠之。天道皇王之大。一以
身體力行爲宗。學徒問王守仁之學。柘曰。講其學而
行。非勿信可也。不講其學而行。是信之可也。又曰。學
而行之。講知行之不合。無損也。學而不行。講知行之
合。無益也。在官次。父書至。再拜使者受而跪讀之。其
他親友有書受讀。亦各有儀。聞期功喪。必爲位哭。奠
卒之日。高陵人爲之罷市。四方及解梁門人聞計。皆
爲位而哭。陝西提學謝少南與郡守李文昇祀之。正
學書院海內人士無識不識。皆曰。關西夫子呂仲木。

舒芬

舒芬字國裳進賢人舉正德十二年進士第一人授翰林修撰其明年孝貞皇后崩武宗踰月卽欲往山陵又革一應擺路軍馬芬上言陛下三年之內當深居九重無復外出雖釋服之後儼然熒疚如成王免喪朝廟之時抑自古萬乘之尊非奔竄逃匿未有輕身不嚴侍衛者旣又上車服疏言天子等威莫大車服而下同庶人甚非所以辨上下定禮義又言孝貞作配茂陵未聞失德祖宗之制旣葬迎主必入午門

昨孝貞太皇太后主以從陛下駕入旁門使他日作
史者以春秋法書之曰六月己丑車駕至自山陵迎
孝貞皇后入長安門則讀者亦必以春秋公薨書地
不書地之法求之卽孝貞不得正終之疑不解矣宜
明詔中外以示改過二疏反覆凡數千言又明年車
駕欲南巡諸大臣莫敢言者芬與考功郎夏良勝儀
制郎萬潮庶吉士汪應軫風約諸曹連章畱駕章上
罰跪午門者五日杖三十謫芬福建市舶副提舉芬
疏謂今日之事痛哭泣血有不忍爲陛下言者江右

有親王之變。大臣懷馮道之心。以祿位爲故物。以朝
署爲市廛。以陛下爲奕碁。以革除年間爲故事也。復
刺閣臣。謂一切安危之跡。不苦口以救。而聽主上之
自壞。言甚激烈。杖後臥病院中。掌院懼禍。擿出之。芬
曰。吾官此卽死。此旣謫。裴瘡就道。或勸待瘡曰。死吾
分也。敢少畱耶。世宗卽位。起諸逐臣。芬適奔父喪。服
闋復官。諫議大禮。與陳沂三上疏。再被杖。以母喪歸。
尋卒。芬風神。玉立。負氣削厲。家無立壁。端居。竟日未
嘗晝寢。夜則計過。自訟。銳然有志。聖賢之道。於五經

皆有疏論而最好周禮謂漢儒多附會之罪宋儒有
表率之功又言周茂叔吾道中興聖人也建圖屬書
貫六經語孟而一之閩學得之洛洛學得之濂正叔
言伯淳得不傳於遺經幾背師矣世儒譏晏嬰不知
仲尼伯淳仲晦而下迄今亦孰知茂叔耶時方尊王
守仁之學芬曰必窮天地之高厚必參百王之憲章
必極禮樂之中和語鬼神之情狀與夫萬變之所以
應萬物之所以名然後可謂之道問學此則有不可
僞爲者矣今才智之士飾虛聲鼓後進則尊德性之

說易掩覆也。黨陸者特竊其一節。異朱者未覩其大。全非心爲道者也。芬兼知天文。曉音律。嘗與香山黃佐反復究論。佐深韙焉。卒時年四十有四。其子跪泣請所言。猶以未及表章。周禮爲恨。世名芬爲忠孝狀元。

馬理

馬理字伯循。三原人。宏治十一年。以春秋魁爲鄉試。再試禮闈未第。遊太學。與呂柟崔銑諸公交相切劘。文章德義名震都下。正德九年。登進士。年四十一矣。

授吏部稽勲主事。改文選與郎中不合。引疾歸。居三年。復任。與黃鞏等諫南巡。被杖。未幾復歸。授徒講業。嘉靖三年。復薦起。率同官伏闕爭大禮。被杖。復職。歷員外郎。考功郎中。時考察外官。內閣冢宰各挾私忿。欲去廣東提學魏校。河南提學蕭鳴鳳。陝西提學唐龍。理曰。三人者有數人物。若欲去之。請先去理。既考察京官。有附勢三人。輒首黜之。曰。搏獸先虎。擒賊先王。已遷南京。通政使復謝病歸。復薦起。光祿寺卿。復謝病。二十年。復薦起。南京光祿寺卿。亡何。引年致仕。

理居嘗言身可紉道不可紉行可則仕惟孔子能之
下此惟當守經以故屢進屢退自其筮仕以至謝政
無日不從事學問其學一以窮理居敬爲主四方學
徒轉相授受自縉紳士子以至田夫野叟無不欣慕
之雖四彝亦聞其名安南貢使至問部郎黃清曰遠
聞馬道學名所願一見今何不在仕列清曰馬公高
尚朝廷不薄馬公馬公自高尚也高麗使至亦問馬
主事爲聖朝第一人宜加厚遇乞頒賜所爲文使國
人矜式其見重如此年八十餘嘉靖乙卯關中地大

震與其妻同壓土窖中。隆慶三年，贈右副都御史，賜祭葬。

張岳

張岳，字維喬，惠安人。曾祖茂，仕桐廬縣丞，清介絕俗。家藏書數千卷。父慎，知英德縣，有聲。岳成童，盡讀茂所藏書。宗尚程朱。正德八年，選閩第一，當謁鎮守太監長揖而已。十一年，第進士，與同郡陳琛、林希元、仇居佛、寺閉戶講易。人竊竊指曰：「泉州三狂生也。」岳沉毅樸古，其始以道學文章自命，最後用事，功顯終岳。

仕相者張璪嚴嵩夏言皆秉權得勢岳頡頏不爲所獨徐階知而交好之始授官爲行人武宗寢疾豹房岳疏言自古未有人主寢疾獨宦者侍宜令大臣經筵科道官輪直起居太醫院日呈藥方於內閣庶關節通透可備意外之虞不報車駕南巡與同官諫止下獄罰跪廷杖謫南京國子監學正肅帝登極盡還武廟諫者岳得復職吏部欲選爲科道官不應丁父憂服闋吏部復欲取選如前又不應陞右司副念母老乞南陞武選員外轉祠祭郎仍南俄承重祖母及

丹○憂○居○家○結○草○堂○於○其○縣○之○淨○峰○名○山○心○精○舍○益○讀○
書○其○中○時○王○守○仁○新○學○甚○盛○岳○持○程○朱○說○渡○江○與○辨○
居○三○日○不○合○歸○立○學○則○二○十○餘○條○自○勵○曰○居○敬○窮○理○
蓋○聖○賢○所○指○以○教○人○者○王○氏○諱○窮○理○任○良○知○安○知○主○
或○指○人○心○爲○道○心○認○氣○質○爲○天○性○者○岳○晝○夜○讀○書○皆○
有○課○程○至○天○文○兵○法○稗○官○野○史○亦○有○涉○手○較○以○傳○博○
學○窮○理○之○義○聶○豹○以○御○史○行○部○未○視○事○輒○先○過○岳○也○
服○闋○補○主○客○郎○時○世○宗○方○定○大○禘○禮○下○相○張○璪○議○地○
求○始○祖○所○自○出○之○人○實○之○禮○官○知○非○是○也○强○從○其○奏○

奏已具。侍郎李時以問岳。岳曰：國姓德祖而上高皇帝，所不能詳也。上明聖，首議大禮而舉大祭，官恬然祭非其祖哉？如執政議不可，時以告璫。璫竟以初議上。內批如岳所言，璫大駭，亟欲致岳以館職。岳謝不見，出爲廣西提學僉事。時行選貢法，璫主其議，選無論廩次，輒取年少有文者。岳紬不如璫指，十一年入賀聖壽，改提學江西。又不謁璫，謝是時江西人正尊尚王氏學。岳約士守程朱書，毋口良知。居一年卒。用廣西貢事謫廣東鹽課司提舉。御史行部至潮，會岳

病足治書守巡使者請好謝御史下官病足未任庭
參也御史不憚明日檄署南海縣以病辭不可固辭
御史劾奏岳也同官解不得請岳謝岳曰吾無罪於
御史何謝也御史聞乃追還劾疏會報守廉州岳往
御史乃言所以待岳者出璵意廉邊交南吏往時皆
蠲苟歲而已岳省禁令減繇役督民種田有棄地廣
衍令開墾不知取水法教之車戽堂上無事坐讀書
與諸生削等爲師友而廉士皆知學世宗十五年以
招降安南莫登庸陞俸一級賜銀幣尋以征瓊州叛

黎功陞賜如之。而岳以事功顯矣。北口入邊。邊帥被逮。南北科道交章薦岳。吏部上岳名。陞右僉都御史。撫治鄖陽。旣命巡撫江西。江西士大夫來言。西土貧困。望公善治之。岳曰。岳無他才能。獨思用民一錢如針刺體血。相夏言治生塚使司議費於廣信七縣。縣措千金。岳曰。是將範金爲柳耶。縣百金足矣。帝賜相嚴嵩第。名其閣曰迎恩。官治之所。司請岳費。岳批牘與千金。皆相顧嫌少。則益五百而已。又請不益也。貽嵩書曰。閣侈上恩。亦訓恭儉。俗情不察。猥將侈其輪。

與而岳仰體相公德意節裁之言與嵩無以咎也。乃
反陽爲謝岳所善友人密告岳岳荅曰寒骨稜稜死
時止少馬革一張其他自分已定公毋念也其年陞
副都御史提督兩廣是爲嘉靖二十三年兩廣督府
故饒供億岳寒儉不取用又不以通遺權貴徽州縣
吏非召不得至轅門至不得手一持入門內其明年
討封川文德大滑腦諸巢平之捷聞陞兵部右侍郎
兼僉都御史賜銀幣明年奉旨征融懷馬平諸獍進
攻馬鞍魚窩等寨平之又有加俸銀幣之賜召爲刑

部右侍郎巡按廣西御史徐南金與總兵沈希儀言
岳忠純果毅有古大臣風。賀連反側未定。未宜遽奪
之去。有旨復畱一年。明年征賀連克之。召入爲兵部
左侍郎。尋陞右都御史。入掌院事。湖廣四川貴州間
有山曰蜡爾。諸苗居之。其東麻陽鎮。尊爲湖苗。其西
銅仁諸苗爲貴苗。其西北接四川之酉陽。宣撫先後
相煽反。皆入保蜡爾山。兩省守臣經畧不時定。其時
起萬鏜爲副都御史。勦之。四年不克撫之。湖苗定而
貴苗未靖。鏜欲急成事。奏苗平。請班師。尋入爲兵部

侍郎而龍許保吳黑苗復亂。時嵩子世蕃故銜岳無所往來。言於兵部推岳以原官總督湖廣川貴軍務。既至與諸監司熟計。皆言如鎧先撫之便。否則戍之使不得出掠。撫貴都御史李義壯亦附鎧議不欲變。岳言貴苗不戢。是爲湖苗煽端。前者萬公撫至矣。卒不可聽。卽欲戍。戍兵少。卽疏勦之。因劾奏義壯坐奪官而鎧與王學益前爲總督撫處苗者二人與嵩親有連。復從中撓岳。岳號令不得獨行。意嘉靖二十九年。貴苗出破印江。寇石阡。貴中大震動。帝切責岳。岳

上表謝罪。乃圖上用兵十數事。召勵諸將。屬石邦憲等分兵入岳。入銅仁。身督之。先後擒斬俘獲二千餘。賊巢皆害。藏發毀殆盡。獨龍許保吳黑苗跳匿林箐。不可得。酉陽宣慰使冉元者。嘗攻平茶。殺官奪印。懼并誅。嗾許保黑苗曰。張總督在。吾與若不帖席也。乘今兵稍撤。共奪一城。總督受罪去矣。思州者。城小而貧。易入也。元合苗突入之。殺死吏民百餘人。執太守李允簡。與其幕僚去。邦憲發兵邀之。苗縱允簡還。而允簡死。事奏上。方齋戒止封。世蕃復言。嵩張總督宜

逮治也。徐階持不可。左都御史屠僑、兵部尚書張經等謁嵩言。岳嵩曰：「法當逮。」僑曰：「公寬之。海內正人也。」嵩曰：「人固有正否耶？」賊陷城，孔孟不貲矣。僑等相視氣阻。經寄岳書：「公生死懸嚴氏手，旦夕矣。」岳曰：「妄也。安有立脚如張維喬坐不與宰相錢死乎？」既知故書，沓至岳曰：「死卽死爾。」自古刀鋸鼎鑊皆士君子致命遂志之地。豈聞迂徑求免者？旣帝開封，乃不逮岳。奪一官，以兵部侍郎兼右僉都御史職銜戴罪任事。亡何，邦憲搜賊敗，斬之。苗大震擒獻，許保自贖。岳以聞。

嵩謂岳使曰擒龍許保善矣吳黑苗尚在須勦絕也
俄得旨如嵩所以語岳者且令三省巡按御史具覈
奏報而冉元思州之謀露岳上元罪狀請逮治而元
先使挾萬金入世蕃所求輕旨岳又訐其事請下錦
衣捕元所使人或曰公不爲嚴氏諱乎岳曰正以破
其庇元之謀何諱也疏入世蕃愈仇恨時先後推岳
爲尚書者再嵩皆阻之最後推爲南京都御史嵩曰
三巡按報未至何急也有旨罰會推九卿俸於是亡
敢有請召岳者或語岳苗黨安可絕嚴氏父子在公

不○內○徙○明○也○曷○稍○自○貶○岳○笑○指○其○髮○曰○種○種○矣○吾○昔○
少○年○張○相○屢○招○不○得○我○一○見○今○入○錢○買○官○乎○吾○知○捕○
黑○苗○應○上○旨○而○已○乃○責○石○邦○憲○使○自○爲○功○而○黑○苗○遂○
就○擒○嘉○靖○三○十○一○年○也○湖○廣○巡○按○當○勘○報○令○藩○司○出○
庫○羨○三○千○金○送○岳○所○聽○其○犒○軍○意○欲○岳○行○金○嵩○所○結○
嵩○歡○岳○盡○貯○之○辰○州○府○謂○府○太○守○吾○死○取○其○中○三○十○
金○具○木○若○殮○他○毋○毫○髮○動○黑○苗○報○至○嵩○擬○旨○下○兵○部○
覆○議○而○是○時○聶○豹○爲○兵○部○侍○郎○言○宜○召○還○否○則○當○復○
故○右○都○御○史○階○言○嵩○尤○力○終○不○得○階○報○岳○曰○力○請○公○

名○內○不○得○亡○奈○公○古○執○何○豹○亦○言○公○於○元○相○太○疏○簡○也○然○岳○雅○稱○平○生○据○經○不○能○從○諸○道○人○拜○齋○禁○中○身○尚○書○卽○不○能○白○事○宰○相○兒○無○內○徙○意○其○冬○卒○於○沅○州○督○府○岳○五○年○總○督○不○挾○家○蒼○頭○第○取○村○樸○不○解○事○者○守○巡○兵○備○視○殮○退○閱○其○衣○牀○褥○席○皆○枝○梧○綻○裂○駭○曰○有○是○哉○公○簡○儉○也○喪○出○沅○人○迎○哭○不○絕○聲○卒○之○明○年○三○巡○按○疏○報○言○功○得○旨○復○岳○官○予○卹○典○贈○太○子○少○保○予○謚○蓋○當○嘉○靖○之○朝○帝○雖○英○明○獨○斷○而○嚴○嵩○父○子○竊○柄○甚○一○時○邊○臣○爲○自○全○計○饋○遺○相○屬○岳○獨○不○通○一○書○

故○用○兵○有○功○嘗○薄○其○賞○微○失○利○輒○被○譴○然○亦○賴○帝○之○
明○卒○以○功○名○終○徐○階○謂○岳○子○曰○嚴○氏○擅○政○二○十○年○邊○
督○臣○不○入○一○錢○而○身○名○俱○全○者○惟○尊○公○一○人○而○已○所○
著○有○聖○學○正○傳○更○定○禮○記○恭○敬○大○訓○兵○鑑○諸○書○聖○學○
正○傳○見○王○守○仁○辨○後○所○輯○恭○敬○大○訓○則○取○責○難○陳○善○
之○意○

鄭世威

鄭世威字中孚福建長樂人方總帥題其齋曰志樂
顏瓢貧甘范甌弱冠舉於鄉既成進士會臺臣闕詔

從諸進士推擇衆競趨之世威曰纔脫章句蠟司耳
目耶授戶部郎丁艱改刑部出爲廣西按察僉事尋
改廣東丁內艱復除江西貴溪夏言再召入相諸司
往賀開角門延入世威便却退呼閤者曰相國固尊
然奈何令邦大夫縮縮旁趨還吾刺去爾門者開中
門乃入言未子也巡撫汪元錫偕言有事上清宮名
爲祝釐世威從諸司往拜祝祝詞乃知爲相祈子拂
然不拜出轉浙江布政參議言再相過武林世威復
不與諸司郊迓也轉江西按察副使時分宜嚴嵩代

言族黨黷暴張於言矣。世威輒用三尺繩治有抵重
法者。獄具矣。巡撫傳將改論。世威持之不能奪也。能
憲副者嚴姻也。以輕直占廢寺田千餘畝。世威嘗以
賑饑。熊持相手書求救。不得。遷四川參政。念嵩終整
已投劾歸。歸而薪粲不贍。畊鋤自力。且十年。嵩敗。中
外交薦起。湖廣參政。南京右通政。隆慶初。擢都察院
右僉都御史。左副都御史。華亭相徐階爲王守仁學
廷議有舉守仁從祀者。世威言。王守仁治世能臣也。
謂其紹周程宗孔孟則平生庸德有不足矣。且其率

天下徑趨直行使聖門講學明理之功屏不用將有
毫釐差千里失者與守仁同時講學者泰和羅欽順
惠安張岳世稱賢大夫兩相指擊其謬守仁辨不能
緇蓋守仁以名勝欽順岳以實勝實之與名相去遠
矣階不是也顧其事亦寢轉南京侍郎改刑部侍郎
會有詔採珠及珍石世威疏納忠諫崇節儉不報遂
乞骸歸歸而畊鋤如故里中不知侍郎云世威副使
江西時議請贖鍰備庾賑且謂升石而徵之筐篚而
糜之是好國法也取盈於公廩而尾閭於權門是奪

民命也。纒纒千言。讀之惻切。至有缺以傳者。通籍三十年。朝野參半。自對大僚。臨下吏。與農民處。一本之至誠。其學一以濂洛爲宗。取六籍及儒先語。日誦繹之。錄其精者。獨証於心。曰。心嚴師爲師。心直諒爲友。展也。宋儒實獲我私。年八十二卒。禮官言其厯官權貴之鄉。媚竈是恥。辭榮寂。莫之野杜門。自高人謂盡之。賜祭葬。贈尚書。諡恭介。

蔡元偉

蔡元偉字伯瞻。宋忠惠襄後。總州受學。則已有孝弟。

稱久之見程端禮家塾日程皆宗晦翁教人之法。學當如是。卽手抄服行。慨然有求道之志。嘉靖辛卯。領鄉薦。不謁有司。舌耕爲養。旣十年。就授羅田學。所以教士。卽舉業之中。默誘之聖賢之域。擢德安令。一用節愛爲本。每退食。取小學近思錄伊洛淵源錄。本朝薛胡二子粹言揭觀成誦。卽升堂。亦袖以出。曰。以此當嚴師良友。遷杭州府通判。入覲。事竣。乞終養。家宰李默雅知元偉。命考功懇畱歸。署錢塘印。一月。民甚稱平。擢撫州同知。頗著治績。丁外艱。喪葬。里以

學政卷之四十一
泉中倭棘募建寧有考亭遺風遂移居之元仲學前
程朱而重躬行其所實力惟在飲食衣服男女起居
動靜語默辭受取予之際其自治之勤或至點簡少
懈過失復生輒撫膺泣下長跪自罰作日厯自譏平
生名考德錄嘗曰居常服膺晦翁之言以爲世間事
須臾變滅皆不足寘胸懷惟有窮理修身爲究竟法
又有四書折衷易經聚正各若干卷

鄧元錫

鄧元錫字汝極南城人少事司訓黃在川博覽經史

人之有志爲己之學十五喪父哀毀如禮事嫡庶二
母至孝家門凜肅十七倣古社倉法行之鄉里里民
耆而貧者婦節而寡者咸聽其貸不取息入其人死
並以所貸爲助葬資十九克邑諸生徧走其州之東
西謁諸長者先生講求學問久之領鄉薦念母高年
不赴會試杜門潛修邑令送行資爲勸駕謝不受居
三年母氏力促之道出吉州就學鄒守益劉陽會有
閩越寇復馳歸侍養居三年母氏復強之下第而還
遂堅執不出授徒講學於天峰山時心學盛行學重

證○覺○九○思○九○容○四○教○六○藝○皆○以○爲○多○元○錫○曰○九○容○不○
修○是○無○身○也○九○思○不○愼○是○無○心○也○及○門○者○皆○彬○彬○有○
造○居○祖○母○及○母○喪○一○準○古○禮○廬○墓○三○年○南○城○之○人○皆○
曰○鄧○君○吾○邑○孔○夫○子○也○所○著○有○經○繹○函○史○諸○書○皆○足○
闡○衍○聖○賢○薈○萃○古○今○范○涑○爲○南○城○令○以○與○南○昌○布○衣○
章○潢○安○福○舉○人○劉○元○卿○並○薦○萬○厯○初○祭○酒○趙○用○賢○復○
以○爲○言○徵○詣○京○師○辭○疾○不○赴○當○道○先○後○薦○聞○神○宗○以○
翰○林○待○詔○徵○之○有○司○勸○駕○敦○促○就○道○竟○卒○途○次○學○者○
私○謚○爲○文○統○先○生○

顧憲成

顧憲成字叔時，別號涇陽無錫人也。生而沉毅迥異，常兒十歲，讀韓文諱，辨請於師曰：「然則親名當諱乎？」曰：「然，自是每遇父諱，宛轉避之。」師喜曰：「此子之志卓矣。」年十五六，家貧，就讀鄰塾，歸必篝燈自課，常至達旦。書其壁曰：「讀得孔書，纔是樂。」縱居顏巷，不爲貧。萬曆丙子，舉鄉試第一。其冬，丁父憂。庚辰，服闋，應春官試，舉二甲二名進士，授戶部主事。與南樂魏允中、漳浦劉庭蘭以道義相琢磨。壬午，調吏部，汲汲以激揚

澄清爲務。丁亥大計京朝官。時都察院左都御史辛自修司計。所是非皆與時俗忤。當路頗惡之。而工部何起鳴在拾遺中。人有謂起鳴若能去自修。大當執政意。卽與自修同去。他日仍不失舊物。起鳴大喜。遂許自修。給事陳與郊承風旨。並論二人抑揚其語。實齟齬自修。而自修起鳴果並罷去。憲成上言爲持平之論。有旨切責。謫湖廣桂陽州判官。憲成至桂陽。其士人皆進而問業。戊子。司理處州府。脩務教化。大有惠德於民。己丑。丁母憂。辛卯。復司理泉州府。壬辰。討

羣吏舉憲成公廉天下司理第一。尋擢吏部考功主事。是年詔三皇子並封憲成。倡四司上言。又自爲書貽輔臣王錫爵語。並切直。癸巳。內計考功郎趙南星一秉公正。畧無瞻徇。計典出。輿情甚愜。而憲成與李元冲實左右之。政府大悲。遂票旨切責南星。降調去。憲成與元冲上疏畧曰。頃者皇上切責吏部專權結黨。趙南星降調外任。臣等與南星生平以道義相期。許及在同部。又以職業相切磨。惟茲內計之典。始而咨詢。繼而商確。臣等皆與焉。今南星被罪。臣獨何辭。

以免伏惟皇上擴天地之量垂日月之明念南星自
謀則拙謀國則忠還其原職以示任事者之勸無徒
快被察諸人之心倘始終以爲專權結黨乞將臣等
一併罷斥無令南星獨蒙其責不報無何憲成司選
益以進退人才爲已任而一切推用頗與政府相牴
牾政府大不悅遂以會推冢宰閣臣事削籍歸憲成
嘗曰天下事君相同心方可爲其次閣銓同心亦得
一半今皆無之止有三十巡撫十三提學可選擇而
使若盡得之士習民生庶幾小補方日孜孜焉與同

官畱意選舉。而其時銓部堂司率皆賢者。一時人心
庶蒸蒸不變矣。然中貴人干請不行。柄國者好惡相
左。遂相繼逐去。自憲成去而隄防盡。決識者不能不
爲之痛惜。云憲成歸以積勞成疾。越數年乃愈。戊戌
始會吳中諸同志於二泉之上。與管志道辨無善無
惡。志道之學一貫三教。而實主佛學。憲成謂佛學三
藏十二部五千四百八十卷。一言以蔽之曰無善無
惡。七佛偈了然矣。故取要提綱。力剖四字。又以辨四
字於告子。易辨四字於佛氏。難以告子之見性。龔佛

氏之見性微也。辨四字於佛氏易。辨四字於陽明難。在佛氏自立空宗。在陽明陰壞實教也。其說甚詳。具所著證性篇。無錫故有東林書院。宋楊龜山先生講學處也。後廢爲僧舍。憲成聞於當道。葺楊先生祠。構精舍。會吳越士友。一以考亭白鹿洞規爲教要。在躬修力踐。以救一時學者虛高之弊。嘗曰。孔子所謂工夫。恰是本體。世之所謂本體高者。只一段光景。次者只一副意見。下者只一場議論而已。人以爲知言。戊申詔起南京光祿寺少卿。憲成曰。吾衰矣。不能仕進。

也。遂乞骸骨。然與時局忤甚。朝議紛紜。動以東林爲口實。而黨論且大起矣。壬子。以微疾逝。得年六十有三。贈太常寺卿。謚端文。憲成之學。一遵洛閩。不參三氏。而議論醒豁。足以發明先聖之微。至其力闢姚江。尤爲有功。聖道自甲午以後。見地愈卓。充養愈粹。使天假之時。殆未可量。而所遇不偶。竟齎志以歿。悲夫。所著有藏稿。劄記。大學通考。質言。東林會約。商語。還經錄。證性編等書。行世。弟允成。亦以學行風節名於時。憲成嘗稱其庶幾能見大意云。

高攀龍

高攀龍字存之別號景逸無錫人少有異稟言動不苟年十九補邑諸生萬曆壬午領鄉薦年二十五從同里顧憲成講學讀大學或問知入道之要莫如敬遂以程朱爲學的已丑成進士出趙南星之門謁選授行人適四川僉事張世則疏詆程朱請改易傳註頒行所自爲書於天下攀龍奮然曰小人而無忌憚至此哉遂上崇正學闢異說一疏得旨程朱正學崇尚已久豈可輕議近來士習元虛何裨實用高攀龍

所言有關世教。張世則勦襲浮詞來奏。姑免究。未數日。復上今日第一要務疏。內言天下之大本。與天下之大機。欲帝法祖操心。講學勤政。發帑理財。鹽鹽數千百言語。甚剴切。留中不報。論者謂二疏關係學脉。紀綱甚大。其素所蓄積已見。其梗槩矣。癸巳奉使還京時。太倉相王錫爵當國。閣銓相牴牾。小人有附閣攻部者。攀龍憤激。上君相同心。惜才遠佞。疏語侵閣。臣下部院會議。而攀龍謫尉揭陽矣。甲午赴謫所。自省身心。總無受用。遂大發憤於途中。嚴立規程。取先

儒靜坐法。一一體認。覺心氣澄清。有塞乎天地氣象。過汀州。憇旅舍小樓。悟程明道萬變在人。實無一事之語。一念纏綿。瞥焉斬絕。自謂出門至此。學力凡三轉手勢。詳三時記中。乙未。假差歸。戊戌。構水居於蠡湖。取大易七日來復之義。作復七規程。是秋會蘇常諸友於二泉之上。與管志道辨無善無惡之旨。觀聽者踵至。甲辰。東林書院成。東林故有道南祠。爲宋楊龜山先生講學遺址。攀龍與顧憲成請復之。構精舍與同志講習其中。每會洗發提撕。遠近負牆者。人人。

得意而攀龍自敘進學之序則曰吾至丙午方信得孟子性善之旨丁未方信得程子鳶飛魚躍與必有事焉之旨辛亥方信得大學知本之旨壬子方信得中庸二字之旨具困學記中蓋攀龍自癸巳去國至是凡三十年矣學益進而望益重光宗登極詔起謫籍諸臣天啓元年攀龍起光祿寺丞明年晉少卿署寺事綜理微密耗蠹畢清旣而□□失陷京師震驚攀龍以外戚中官家皆奸細窟宅請誅鄭養性李如楨崔文昇以銷隱禍宗伯孫慎行追論紅丸事下九

卿科道會議攀龍謂舊輔交結鄭戚不知有君持論甚峻舊輔者謂烏程方從哲也諸貴戚近習皆側目攀龍思有以中傷之矣未幾轉太常寺少卿有恭陳學要以立治本疏疏內復及方鄭二氏傳旨重處以福清相葉向高力持僅得罰俸已轉大理寺少卿晉太僕寺卿而講學之禁起矣左都鄒元標副都馮從吾皆請告歸攀龍曰講學何罪頓空法紀之臣禁學何名欲行聖明之世力請移疾不允明年春乞差還里貽書給事中王志道論兩朝事大要言人臣爲國

當杜漸防微。懲前毖後。不宜爲亂賊脫罪。爲君父種禍。君讐必報。君賊必討。是臣子身上事。而奈何諱之。加以誣謗也。居無何。卽家起刑部侍郎。疏辭不允。甲子春入都。時副都楊漣疏論魏璫忠賢二十四大罪。疏中及枚卜。蓋指南樂魏廣微也。廣微恚欲與璫合。而外廷諸臣以事權相齟。其機漸惡。攀龍默爲聯絡。備極苦心。會左都缺。廷推首攀龍。時趙南星爲太宰。攀龍以門牆爲嫌。力辭之。而臺省急攀龍甚。以天下事不得引嫌廢至公。議遂決。命下。攀龍控辭不允。旣

入臺激揚風采發御史崔呈秀按淮揚時賕賂鉅萬
褫職遣戍天下快之呈秀既得重譴則潛伏輦轂急
走魏璫以圖洩憤而廣微又以偃蹇被紕益恚恨遂
計不反顧與內合謀以傾正類借會推晉撫事爲一
網打盡之計而攀龍與南星俱罷去矣乙丑春詔獄
起緹騎四出逮楊漣等六人至京各坐重贓先後拷
死諸奸憾未已將欲坐攀龍賴錦衣吳孟明力持得
免至三朝要典成坐移宮一案爲南道游鳳翔所訐
削籍爲民追奪誥命攀龍忻然曰非此異日無以見

諸公地下先是京師議毀鄒元標等所建首善書院。削元標等籍至是議盡毀天下書院而東林尤所最忌。首先毀之東林遂爲瓦礫區矣。攀龍屏跡湖上玩易不輟。斷橋以謝客者逾年。丙寅春復逮繆昌期。周宗建攀龍自度不免。先一日肅衣冠謁龜山先生祠。作別聖文歸而傳吳門信頗異。攀龍微笑曰其然乎。吾視死如歸爾。是夕家人聚酌如常。無一言及家事。第曰鬻田可得千金。完緹騎費。俟天明蕭然就道矣。就寢至夜半復傳前信至。攀龍整衣起從容入書齋。

作字二紙。鐫篋中。復之內寢。款語半晌。出取所封紙。置几上。指示兩孫。明日以此付官旗。勿先發。兩孫出。頃之。聲息寂然。諸子推戶入。第見一榻楞然。杳無蹤跡。發几上封視之。乃遺表也。云。臣雖削奪舊係大臣。大臣受辱。則辱國。故北向叩頭。從屈平之遺君恩。未報結願來生。臣高攀龍垂絕書。乞使者執此報皇上。復有別友人書云。僕得從李元禮。范孟博遊矣。一生學問至此。亦得少力。諸子讀未竟。大驚。急趨視池濱。則攀龍已赴水矣。時三月十七日丑時也。得年六十。

有五懷宗登極璫誅詔褒恤東林諸臣之受禍者贈攀龍太子少保兵部尚書賜祭葬謚忠憲錄其子攀龍之學以程朱爲的以復性爲主以知本爲宗以居敬窮理相須並進爲終身之定業四方從遊者至先令讀小學近思錄等書次卽令靜坐以養深厚之氣作心性說曰心與性謂之一則不可混謂之二則不可分佛氏所謂性皆心也聖學從窮理入故卽心卽性佛氏不窮理故是心非性又曰佛氏一切平等最忌分別是非如何紀綱得世界聖人因物付物是者

是之非者非之我無與也。所以能開物成務其開陽明無善無惡之說。謂道性善者以無聲無臭爲善之體。陽明以無善無惡爲心之體。一以善卽性也。一以善爲意也。故曰有善有惡者意之動。佛氏亦曰不思善不思惡以善爲善事惡爲惡事也。此何可言明善作主敬說曰學有無窮工夫心之一字乃大總括心有無窮工夫敬之一字乃大總括千聖萬賢只一敬字做成攀龍爲學教人之法。總不出此諸說中欲學者進則以此施之天下退則以此修之吾身如行者

之有家。畊者之有畔。宛然程朱家法也。不幸沒於黨禍。未究厥施。惜哉。攀龍於書無所不窺。尤深於易。著有周易孔義。乾坤垢復諸說。又輯朱子節要一書。與近思錄相表裏。其餘著述凡二十餘種。皆有關世教云。

愚按有明以理學開國。諸不在魯鄒洛閩之科者。弗列於學官。士生其間。稟承功令。遵守傳注。無或敢騖於新奇之說。以自隕越。家誦法言。人敦實行。越自二祖。以迄成宏。風俗人心。醇龐渾噩。何其盛。

也。正嘉以後新學一倡而士習大變。技握靈蛇書。
疑載鬼優曇竺典。克塞宇宙。雖其間真儒間出。正。
義相扶而極重難返。遂成波靡之勢。陵夷漸積。至。
於大壞。直與洪水猛獸比烈矣。嗚乎學術邪正之。
際。實世道升降之關。事理較然又何疑哉。